

قطع فيار إنسان

«رواية»

بقلم الكاتب الإسلامي

محمد عبد المنعم أبو نور الدين



طباعة وتوزيع دار المعارف

الآراء الواردة في هذا الكتاب تعبر عن وجهة نظر
المؤلف ولا تعبر عن وجهة نظر الناشر

بِسْمِ اللّٰهِ الرَّحْمٰنِ الرَّحِیْمِ

قطعة غيار انسان

تخرج عبد الله قى كلية التجارة بتقدير مقبول.. مثله مثل
آلاف الشباب فى مصر الذين تقذفهم ماكينة التعليم وتلقى بهم
أكواما مكدسة على الأرصفة والمقاهى وأسرة النوم..
وبالفعل أصبح عبد الله يعمل فى مهنة سائق سرير...
فهو طوال النهار ينام على سريره ويتمرغ فيه ويقطعه طولا
وعرضا متقلبا ذات اليمين وذات الشمال حتى تمام الساعة
السادسة مساء ليستيقظ على صراخ أمه..
○ قوم يا عبد الله، الله يخرب بيتك... يا واد فز قوم دور لك
على شغل.
○ حاضر حاضر.. بس هاتى لى أفطر.
○ تظفر إيه الساعة ستة بالليل.. يا ابنى روح دور على شغل
وهات لنا كلنا ناكل.
وينهض عبد الله وهو يتمتم بشتائم خفية يسب بها نفسه
والظروف والأيام.. ويلعن التعليم والشهادة التى يعلقها على
حائط غرفة نومه..
ثم ينزل عبد الله إلى الشارع ليرى هذه الأضواء التى تلالأ
ليلا فى حى شبرا فوق المحلات والمقاهى وفاترينات الكبدة
والسجق.. والضجيج والأصوات العالية..

قطعة غيار إنسان

ضحكات الأصحاب ونداء الباعة المتجولين على الذرة المشوية والتين الشوكى.. وصراخ سائقى الميكروباص يجمعون الركاب..

سحب عبد الله نفسا عميقا من الهواء البارد وملأ به صدره حتى أحس بسعادة تغمره وتطرده من جسمه هواء غرفة نومه المختنقة.. مما أفاض بداخله شعورا مجددا بالأمل فى الحياة..

لمح عبد الله أصدقاءه يقفون على الناصية البعيدة وسرعان ما وجد نفسه يتجه نحوهم وكأنه تريب مسافر وجد وطنه أخيرا.. كانت شلة متشابهة فى كل شىء فجميعهم أكملوا تعليمهم وبعضهم من أهل الدبلوم وبعضهم من أرباب الكليات الميتة مثل كلية عبد الله وجميعهم عاطلون.. ما عدا شخص واحد وهو محسن الذى يمتلك أبوه سوبر ماركت.. ويقوم محسن أحيانا بالعمل فيه لمدة بضع ساعات..

ولكنه بمجرد أن يدخله ينهال عليه أصدقاءه الأعزاء كالطوفان، يطلبون منه السجائر والبيبسى والمعلبات ويدفعون له أغرب ثمن عرف فى تاريخ المعاملات.. وهو قلم خفيف على قفاه تصاحبه ضحكة حميمة مع كلمة «ضيف على النوتة يا صاحبنى ..»

قطع غيار إنسان

وظل الحال هكذا حتى قرر أبو محسن أن يمنعه نهائيا من العمل فى السوبر ماركت حتى ينقذه من الخراب.. فهو لم ير أبدا هذه النوتة التى فيها حساب هؤلاء الأصدقاء.. فأصبح محسن مع الشلة ليلا ونهار..

ألقى عبد الله عليهم السلام بلسعة سريعة على كف كل واحد منهم.. ثم أعطاه أحدهم سيجارة وأنهمكوا يتحدثون فى كل شىء وعن كل شىء.. عن السياسة وعن الرياضة وعن المغامرات العاطفية وعن المشاكل وعن بضاعة أبو محسن التى أصبحوا يشتاقون إليها..

- فىن أيامك يا محسن.. كان محل أبوك بيحل لنا أزمات..
- أنتم السبب إنى انطردت، عمر ما واحد فىكم دفع مليم..
- هنجيب منين يا محسن ما انت عارف الحالة..
- طيب ايه رأيكم.. فى شركة فى العاشر من رمضان طالبة ناس للشغل..

○ تانى قطاع خاص.. يا عم صاحب الشغل بيستعبدك ويعاملك على أنك عبد عنده..

○ ايه الكلام الخايب ده.. هو انت عمرك بتشوف صاحب شركة كبيرة زى دى أو عمرك حتى هتقابله..

○ طبعاً انت عايزنا نشتغل عشان نسد لك ديون أبوك..

○ لا والله انا هروح وهجرب زيكم..

وقرر عبد الله أن يذهب ليجرب حظه فى هذه الشركة..
وأخذت تداعبه الأحلام الجميلة.. ربما ينجح فى الشركة..
وربما يتدرج فى المناصب حتى يصبح مديراً.. وربما يأتى يوم
ويقابل صاحب هذه الشركة ويصبح ذراعاً اليمنى.. وربما
أيضاً يتزوج ابنته بعد أن يوقعها فى شبك غرامه.. ولم لا..
إن بداخله إحساساً عميقاً منذ طفولته أنه سوف يصبح غنياً
وناجحاً.. بل إنه يقين وليس مجرد إحساس أنه سوف يكون
من كبار الأثرياء.. فهو يمتلك كل مقومات النجاح.. عقل وذكاء
وعبقرية وخبرة وتجارب وخبث ومكر..

كما أن له كاريزما عجيبة يراها كلما نظر فى مرآته . كل
مشكلته أنه نشأ فقيراً فى أسرة معدمة... ولكن هذا ليس عائقاً
فكل النجوم والعباقرة قد نشأوا فقراء معدمين مثله.. المسألة إذاً
ليست مسألة فقر وإنما مسألة وقت.. ومعاد ضربة الحظ...
كانت مشكلة عبد الله فى أنه لا يجد حتى أجرة المواصلات
التي ستوصله إلى مقر الشركة فى العاشر..

قطعة غيار انسان

إنه على الأقل يحتاج إلى عشرين جنيها حتى تكفيه ذهابا وإيابا..

كما أنه لابد سيحتاج أن يأكل ولو ساندوتش واحد طوال هذا اليوم.. إن أقل من عشرين جنيها لن يكفي ليوم مثل هذا.. لم يكن مع أمه هذا المبلغ البسيط.. ولذلك كان على عبد الله أن يخوض مغامرة جديدة من مغامرات ديونه المرة.. حتى يجد أحدا يقرضه هذا المبلغ..

وفي الصباح كان عبد الله يمشى مترنحا في الشوارع ويشعر بعدم توازن في عقله وجسمه.. فهو منذ فتره طويلة لم يستيقظ مبكرا في هذا الوقت..

كان له زمن بعيد لم ير ضوء الشمس في الصباح.. وجلس عبد الله على دكة خشبية في موقف الأوتوبيس المزدحم كي ينتظر الأتوبيس الذي سوف يوصله... وأخذ عبد الله يتأمل الناس من حوله..

حركة الناس المتزاحمة السريعة مثل النمل.. كيف يجرون ويتسابقون إذا وصل الأتوبيس المنتظر.. الكل يجري على رزقه.. كل إنسان من هؤلاء يسعى إلى مكان سوف يجلب منه

قطعة غيار إنسان

المال.. كل واحد منهم يعرف له مقراً سوف يقبض منه راتبه..
ما عدا هو.. فهو الوحيد الذى ليس له أى مكان يعطيه أى
نقود.. إنه إحساس بغيض..

أن تكون فى هذه الحياة ليس لك أى شىء يدخل لك موردا
للنقود.. لا وظيفة ولا معاش ولا ميراث ولا محل ولا حتى
شخص من أقاربك يتكفل بمعيشتك... لا يوجد لك أى رصيد
يجعلك تقف على أى شبك صرافة.. إن ما عليك هو أن تدفع
ولا تأخذ شيئاً.. وإنما تدفع فقط..

وأما هؤلاء الناس الذين يستيقظون كل يوم مبكرا وينتثرون
فى الشوارع كالجراد.. فإنما لكل واحد منهم هدفه ومكانه الذى
يعرفه وسوف يجلب منه المال.. إذا فكل هؤلاء الناس يسعون
ويتحركون من أجل المال.. إذاً فهدف الإنسان من الحياة هو
المال.. ثم راح عبد الله يتعمق أكثر وأكثر فى أفكاره.. فقال:
ولكن ما هو المراد من المال؟ لماذا يتعب كل هؤلاء لمجرد
الحصول على بضع أوراق.. إن المال فى حقيقته هو مجرد ورق
مثله مثل ورق الجرائد أو ورق الكرايس.. هو مجرد ورق..
ولكن هذا الورق يشتري الناس به الطعام.. إنهم يأكلون به

قطعة غيار إنسان

ويطعمون به أولادهم.. إذاً كل هؤلاء يتحركون من أجل الطعام..
إذا هدف الإنسان من الحياة هو الطعام..
وهنا انتبه عبد الله أن أمامه على الرصيف الموازى له توجد
فاترينة محل كشرى..

فقرر عبد الله أن يدخل المحل ويتناول طبقاً من الكشرى
يسد به جوعه ويتناول به طعام الإفطار.. فإن هذا هو أهم شيء
الآن.. لأنه هكذا قد هداه تفكيره أن الإنسان إنما يسعى في
الحياة من أجل الطعام..

ودخل عبد الله المحل الذى قد فرشت أرضيته بنشارة
الخشب الملونة.. وملأته روائح الصلصلة والثوم والتقلية
المصرية..

كان مملوءاً ضجيجاً من أصوات الملاعق والمغارف التى
ترن كل حين على الحلل والأطباق فتحدث صوتاً عالياً مثل
الأجراس..

ورغم أن المحل كان مزدحماً إلى حد ما فإن كل واحد كان
مشغولاً بنفسه وبطبق الكشرى الذى أمامه.. ما عدا عبد الله
الذى كان يجلس بدون طبق كشرى ويبدو أن عمال المحل قد

قطعة غيار إنسان

نسوه فى زحام الزبائن.. فأحس عبد الله بالضيق فهو كان يظن أنه سيجد المحل فارغاً..

فان الناس عادة لا يتناولون الكشرى فى وجبة الفطار.. ولكن هكذا القاهرة.. كل شىء فيها مزدحم.. وكل بضاعة لها عشاقها وزبائنهما حتى ولو كانت حصى وحجارة..

تطور شعور عبد الله مع الوقت من الضيق إلى الحياء والخجل.. فقد انتابه إحساس فى جلسته بأنه مثل الشحات الذى ينتظر الطعام وأنه لتفاهته لم يشعر به العمال ولم يهتموا به.. وأحس بالخجل لأن الناس يأكلون وهو يجلس وكأنه ينظر فى أطباقهم..

وذكره هذا المشهد بموقف جلوسه على كورنيش النيل وحيدا مع نفسه.. بينما يجلس كل شاب مع حبيبته أو خطيبته.. فيبدو وكأنه مسكين غير مرغوب فيه سقط فى هذا المكان عن طريق الخطأ.

وعندها لم يتمالك عبد الله نفسه وصاح صيحة لا شعورية يثار بها لكرامته.

○ أنت يا عم اليباع.. أنا قاعد هنا من ساعة!!

قطعة غيار انسان

وكانت نتيجة صيحته العالية المفاجأه أن كل الزبائن الجالسين التفتوا إليه ما عدا عامل المحل الذى لم يعره أى اهتمام وراح يواصل تقديم طلبات الزبائن الآخرين..

فشعر عبد الله بالاحراج والغضب أكثر وأكثر فصرخ مرة أخرى بصوت أعلى ونبرة يملأها التهديد..

○ انت يا عم انت.. هتخلص ولا أمشى!! أنا مش فاضى..
فرد عليه عامل المحل فى برود ولا مبالة وهو يضع طبق الكشرى أمامه..

○ عايز تمشى امشى.. وبعدين يعنى هو انت وراك الديوان..
وفكر عبد الله أن ينصرف بالفعل.. ولكنه خشى أن يكون انصرافه وخروجه من المحل بهذه الطريقة سيكون ملفتا له أكثر وسيسبب له إحراجا أكبر أمام الزبائن.. كما أن انصرافه لن يقدم أو يؤخر فى ميزانية المحل فهو مملوء بالزبائن سواء بوجوده أو بعدم وجوده..
كما أنه بالفعل ليس وراءه الديوان كما قال له عامل المحل..
وبدأ عبد الله ينظر فى هيئته وثيابه وقد تشكك أن ثيابه العادية ربما تكون هى السبب فى عدم توقير الناس له .. وأثناء هذه الأفكار المتلاحقة كان عبد الله قد التهم طبق الكشرى..

خرج عبد الله من المحل ليجد أن الدكة التي كان جالسا عليها أصبحت فارغة.. فتأكد أن الأوتوبيس الذى كان ينتظره قد مر وأخذ الركاب فى فترة غيابه القصيرة..

وبعد صباح مرهق قضاه عبد الله متنقلا بين الأوتوبيسات والتاكسى والميكروباص.. وقد ركب جميع أنواع المواصلات العامة حتى وصل إلى مقر الشركة فى العاشر من رمضان فى إحدى المناطق الصناعية.

وبالفعل التحق عبد الله بالوظيفة..

لم يكن عبد الله يعرف أن نهاية وظيفته هذه سوف تكون السجن وليس النجاح والمستقبل والثراء..

أصبح يصحو كل يوم مبكرا ليذهب إلى عمله فى العاشر من رمضان ويعود فى آخر الليل بعد رحلة شاقة مع عناء المواصلات فى زحام القاهرة..

كان للشركة أوتوبيس خاص ولكنه لم يكن يدخل إلى الحى العشوائى الفقير الذى يسكنه عبد الله..

وكان الراتب الذى يتقاضاه أقل بكثير من تكلفة مواصلاته وثيابه ونفقاته الخاصة.. فلم يعطه المرتب سوى القدرة

قطعة غيار انسان

على شراء بعض الوجبات السريعة وبعض السجائر وأجرة المواصلات..

ولكنه لم يكن بهذا العمل قادرا على الإنفاق على بيته وأخوته الصغار أو الحلم بمشروع خطبة أو زواج..

قرر عبد الله أن يقيم في مدينة العاشر وأن يستأجر شقة هناك مع بعض العاملين ليوفر نفقة المواصلات.. ولكنه تفاجأ هناك بأن نصيبه من أجرة الشقة وتدبير طعامه وشرابه كلفه أكثر من الأول..

فإن والدته بالرغم من كل شىء كانت لها القدرة على تدبير حاجات المنزل بأقل تكلفة وبما تقتضيه من الجيران.. وقد علمها الزمن والفقر كيف تدخر من العدم حتى لا يجوع أولادها..

وأصبح عبد الله يدور مع ترس الماكينة التي يعمل عليها كل يوم والتي لا علاقة لها بتعليمه أو شهادته وطموحه..

ومع ذلك كان يعمل بكل جهد وتفان حتى لا يصبح للحظ حجة في أنه مقصر أو كسول..

لقد أصبح منتجا وصار يرى ماكينته تعمل وترمى كل يوم ما يزيد في ثراء أصحاب الشركة..

وأما هو فالحال كما هو الحال.. إنه يحتال في نهاية كل

قطعة غير انسان

شهر كى يدبر نفقاته ولكن لا أمل لديه فى أن ينفق على أهله
أو يتزوج أو يصنع مستقبلا..

وارتضى عبد الله بحاله وقرر أن يواصل عمله فى صمت،،
فهكذا هو القطاع الخاص.. ويكفى أنه نجا من لقب
«عاطل»..

حتى أتى هذا اليوم الذى لم يكن فى الحسبان..
لقد قضى عبد الله طوال الشهر يعمل ويقترض على أمل
واحد.. إنه ذلك اليوم.. يوم واحد فى الشهر الذى سيتقاضى
فيه مرتبه حتى يسد ما عليه من ديون وأقساط..
ولكنه فوجئ بصراف الخزنة فى هذا اليوم يغلق شباكه فى
وجوههم وهو يقول:

○ مافيش مرتبات.. الخزنة فاضيه.. اطلعوا على الإدارة..
وبالفعل توجه عبد الله مع باقى العمال إلى إدارة الشركة..
التي لم تسمح لهم بالمقابلة.. وقرر رئيس القسم أن يقابل خمسة
منهم فقط ليتحدث إليهم ويسمع شكواهم..

واندفع عبد الله ليكون وسط هؤلاء الخمسة المختارين.. فقد كان
يشعر بأن انفجارا سوف يحدث بداخله إن لم يتمكن من أخذ
راتبه بعد كل هذا العناء الطويل.. وبالفعل دخل عبد الله بين

قطع غيار انسان

هؤلاء الخمسة إلى مكتب رئيس القسم المكيف والمفروش بأحدث
أطقم صالونات المكاتب..

كان أمام رئيس القسم فنجان كبير - مج - مملوءا نسكافيه
فتناول منه رشفة خفيفة ثم خاطبهم وهو يوجه الكلام إلى رجل
كبير في السن منهم قائلا في هدوء:

○ في ايه يا حاج عطا.. زعلانين ليه؟

○ أبدا يا باشمهندس ربنا مش يجيب زعل ولا حاجة، كل
الموضوع أن...

وهنا قاطعه رئيس القسم بحدة وقد تحولت لهجته من هدوء
ووداعة إلى عاصفة حادة..

○ موضوع إيه يا عطا اللي انت عايز تحكيه.. انت مجمع
العمال وعامل تجمهر وعايز تعطل الشركة.. اخص عليك
راجل كبير وناقص.. كل ده علشان المرتب اتأخر شوية،
وايه يعنى.. الشركة بتمر بأزمة بدل ما تصبر عليها، عايز
تولع الدنيا حريقة..

وعندها أدرك عبد الله أن رئيس القسم قد اختار هذا الرجل
المسن ليدير معه الحوار ليس من باب التوقير.. وإنما لأنه يعرف

قطع غيار انسان

تماما أن هذا الرجل الطيب المسكين سوف يقف موقف المدافع فقط وليس المهاجم.. وهذا بالفعل ما حاول أن يفعله الحاج عطا وهو يللم كلماته أمام هذه العصفة الهائجة من رئيس القسم فأخذ يقول:

○ طيب هدى نفسك يا بشمهندس.. انت عندك حق لكن العمال غلابة وعليهم ديون ومحتاجين المرتب.. واطمن احنا مش هنعطل الشغل ولا حاجة..

فكانت نتيجة هذه الكلمات الرقيقة المهذبة أن انفجر رئيس القسم قائلاً..

○ وهو انت تقدر تعطل الشغل؟؟ أنا ممكن أجيب لكم أمن الدولة فوراً.. ده تجمهر وتظاهر وتخريب..

○ لا لا يا باشمهندس مافيش داعى لكل ده.. احنا كلنا راجعين على شغلنا.. وايه يعنى لما نصبر على الشركة.. لازم نصبر وكلنا بنتعذر.. الصبر حلو.. أيوه الصبر حلو.. وربنا يقوى الشركة يارب..

○ طيب ياللا على شغلكم.. عيب كده يا حاج عطا.. أول وآخر مرة أشوف التجمهر ده.

قطعة غيار انسان

وبالفعل بدأ الكل فى الانصراف وأخذ الحاج عطا يقول لهم كل واحد يرجع على مكان شغله المشكلة اتحلّت خلاص.. شوية صبر ياناس.. فأخذوا ينصرفون وكان بعضهم يضرب كفا على كف.. والآخر يضحك فى بلاهة وهو يتمتم - كويس إن أنا عندى جمعية هقبضها بكرة.. وآخر يقول لنفسه - أنا أصلا بشتغل علشان أسلى نفسى أنا مش محتاج فلوس.. وانصرف الجميع ما عدا عبد الله الذى وقف متمسرا مكانه وكأنه صخرة حجرية لا تنطق ولا تتحرك..

فصاح فيه رئيس القسم..

○ وانت ايه اللى موقفك هنا ياللا على شغلك

فقال له عبد الله وهو يثبت عينيه إلى وجهه فى نظرة حادة

○ أنا بس عايز أسالك سؤال!

○ سؤال.. سؤال ايه انت كمان..

○ أنا عايز أعرف انت قبضت مرتبك ولا هتصبر زينا؟

فنهض رئيس القسم من كرسيه وكأن عقربا لدغته بهذا السؤال وراح فمه يتفجر بالصراخ فاخذ يقول والرذاذ يتطاير من فمه

○ انت مين علشان تسألني.. انت متحول للتحقيق.. أنا هفصلك..
أنا هرفدك.. اطلع برده.. هاتولى الأمن.

وراح المهندس فى ثورة هياجة يدفع عبد الله بيده وهو يطرده
من مكتبه..

فتيقن عبد الله فى هذه اللحظة انه لن يعمل فى هذا المكان
مرة ثانية.. وأنه لن يحصل على أجرة تعبهِ وعرقه.. وأنه لن
يصبح مديرا لهذه الشركة فى يوم من الأيام.. وأنه لن يتزوج من
ابنة صاحب هذه الشركة كما كان يحلم..

فما كان من عبد الله إلا أنه وجد رغبة بداخله وشعور عارم
سيطر عليه أنه لا بد أن يضرب هذا الرجل..

وفى أقل من الثانية وجد نفسه يشد قبضة يده ثم يهوى
بها بغير تردد إلى وجه رئيس القسم فكانت نتيجة هذه اللكمة
الخاطفة أنه سقط على الأرض فاقدًا للوعى..

وأحاط فريق الأمن بعبد الله وأمسكوا به وهو يحاول أن يفلت
منهم ويواصل ضرب رئيس القسم . وتجمع الناس وملأ المكان جو
من الصخب والهرج.. الذى كان نتيجته أن خرج عبد الله والناس
يقتادونه إلى عربة النجدة التى أرسلته إلى قسم الشرطة..

لم يجد عبد الله ما يدافع به عن نفسه أمام ضابط المباحث التي فتح له المحضر..

كان يشعر من داخله أنه على حق.. كان يضرب الظروف والعوائق التي تحاربه طوال حياته.. كان يهاجم مصاصي الدماء الذين لا يشعرون بآلام الناس ويطالبون الضحية بالصبر حتى يتم ذبحها وسلخها..

لكن القانون لا يعرف ذلك.. خاطبه الضابط قائلاً: انت موجه إليك تهمة التعدي على موظف أثناء تأدية عمله وإحداث العاهة المستديمة.. ايه ردك..

○ طيب وأنا اللي تم الاعتداء علىّ في عملي بمنع مرتبتي وتهديدي بالفصل.. أنا اللي المجتمع عمل عندي عاهة مستديمة طول عمري وحرمنى من الوظيفة والجواز والمستقبل.

○ ده يا ابني كلام انشا ماليش دعوة بيه.. أنا بنفذ القانون.. يتم حبس المتهم أربعة أيام على ذمة التحقيق.. خده يا مغاورى على الحجز.

خرج عبد الله من الحجز وتوجه مسرعاً إلى بيته وقد قضى

قطع غيار انسان

فى الزنزانه لىالى سواده لن ينساها طوال حياته جعلته يندم على أنه فكر يوما ما فى العمل.

وبمجرد أن رأى عبد الله سريره سرعان ما ارتقى عليه وكأنه يعانق صديقا لم يره منذ سنين..

وكان التعب الذى أنهك جسده جعله يغرق فى النوم ولا يشعر بالحوار الذى أجرته معه أمه وهو ملقى على السرير..

○ حمدلله على السلامة يا ابنى.. أخبار شغلك الجديد إيه.. أكيد قبضت المرتب.. طيب قوم ناولنى فلوس علشان نسد اللى علينا للجيران واشترى أكل وأعمل لك غدا وبعدين نام براحتك..

مرت فترة من الزمن.. أيام وأسابيع وشهور.. وكان عبد الله راقدا على سريره طوال الوقت.. حتى أصبح لا يخرج من غرفته التى ملأتها رائحة السجائر والهواء العطن.. لم يعد يحلق ذقنه ولا يغير ملابسه ولا يتكلم.. لا يفعل شىء سوى أن ينام ويقوم من نومه ليذخن وينام مرة أخرى..

فقدت أمه الأمل فيه.. ويأس أصحابه أن يخرجونه من هذه الحالة.. وبدأ الجميع يشكون فى أن عبد الله قد أصيب بمرض نفسى..

قطعة غيار انسان

فى هذا اليوم كان قد نام أكثر من سبعة عشر ساعة.. لم يكن يشعر بأمه وأخته وأخوه الأصغر وصاحبه محسن الذين كانوا يجلسون فى غرفته من أكثر من ساعة ينتظرونه أن يفيق.. نادت عليه أمه كثيرا.. ونادى عليه محسن ولكن بلا فائدة.. كان أشبه فى نومه بالميت..

بكت أمه ووضعت وجهها فى كفيها وهى تقول..

○ ابنى الوحيد يا ربى.. سدى وأملى فى الدنيا.. يارب أعمل إيه ماليش غيره.

حاول محسن أن يهدأ من أحزانها وأن يمنحها بعض الأمل..

○ معلش يا أمى ربنا موجود أنا متأكد أن محسن مش طبيعى.

○ مش طبيعى ازاي يا ابنى.. يعنى عيان ولا عنده إيه انا احترت

○ بصى يا أم محسن ممكن يكون معمول له سحر أو لابسه جن.

○ أعوذ بالله من الشيطان الرجيم.. معقوله يا محسن يا بنى.

○ أيوه أنا كنت أعرف واحد جارنا كان ملبوس وكان بينما كثير كده، وبعدين جاله شيخ قرأ عليه وخف الحمد لله تلهفت أم عبد الله وشعرت ببريق من الأمل وقد وجدت في توصيف محسن لحالة ابنها طوق نجاة فى أن تعرف حقيقة حالته وطريق علاجه.. فسألته فى حماس وهى تمسح عينيها ووجهها..

○ طيب نلاقيه فين يا ابني الشيخ ده اعمل معروف؟؟

○ مش تقلقلى يا أم عبد الله أنا أعرف شيخ متخصص فى الحكاية دى وبعث أجيبه.

كان عبد الله فى هذا الوقت قد بدأ يحاول الاستيقاظ.. كانت كلماتهم وهمساتهم تخترق عالم نومه فيسمع بعضها ويرى البعض الآخر على أنها أحلام..

لقد شبع عقله من النوم ومل جسده من هذا الموات البطيء فقرر أن يستيقظ ولكنه كان بالفعل لا يستطيع..

كان يرفع جفنيه عن عيونه بصعوبة بالغة وكأنه يرفع حملا ثقيلًا.. بدأ يرى وجوه الجالسين حوله وكأنهم خيالات وأوهام.. سمع صوت أخته وهى تقول - أهو عبد الله فاق أهو.

قطع غيار انسان

فقامت أمه وجلست على سريريه وهى تقول: اسم الله عليك يا ابنى، إيه اللي جراك.

وتحرك محسن ناحية النافذة الصغيرة وهو يقول: يا جماعة افتحوا الشباك ده لازم نهوى له الأوضة..

ودخل شعاع من الشمس إلى الغرفة ومعه شىء بسيط من الهواء الذى كان مطلوباً ليجدد هواء هذه الغرفة الضيقة والتي أصبحت خانقة بسبب كثرة الموجودين وعدم وجود منافذ للتهوية خصوصاً أنها حجرة صغيرة جداً أشبه بالحفرة لا تتسع إلا لسرير صغير ملتصق بحوائطها وكنبة خشبية لا يفصلها عن السرير سوى بضعة سنتيمترات..

ما أن شعر عبد الله بشعاع الشمس يغمر بصره وحجرتة حتى وضع يده على عينيه وقال لهم بلسان ثقيل..

○ اقفلوا الشباك، اقفلوا الشباك بسرعة، عنيه بتوجعنى مش قادر.

فنهض محسن وأغلق النافذة نصف إغلاق وراح يلاطف صاحبه قائلاً:

○ حمدلله على السلامة يا بطل.. إيه يا عبد الله مش ناوى بقى تقوم وتخرج من الأوضة دى.

قطع غيار انسان

نظر عبد الله إلى محسن بعينه التي ملأها اللون الأحمر نظرة مريبة في تجهم واضح لمدة دقيقة كاملة ولم يرد عليه.. حتى شك الجميع أنه لم يعد يعرف محسن وأنه ربما يكون قد فقد الذاكرة.. حتى أن محسن قد أصابه القلق من نظراته ووجومه وبدأ يشعر بالفعل أن صاحبه لم يعد يعرفه..

فأخذ يكمل الحوار مرة أخرى وهو يريد أن يتيقن هل فعلا عبد الله قد أصبح لا يعرفه!

○ في إيه يا عبد الله انت بتبص لى كده ليه؟ انت مش عارفنى ولا ايه؟

ولكن إجابة عبد الله كانت مفاجأه طمأنتهم جميعا وبددت مخاوفهم
عندما نظر إلى صاحبه وقال نه..

○ هات سيجارة يا محسن.

فضحك محسن بشدة وراح ينطلق فى كلماته وهو يخرج سيجارة لصاحبه.

○ أيوه كده يا رجل.. طمنتنى عليك.. فينك يا عبد الله وفين أيامك.. فاكر لما كنت بتشكك منى البضاعة أيام المحل.

قطع غيار انسان

وتبسم عبد الله على أثر هذه الكلمات وقال فى هدوء ووقار واضح..

○ طبعا فاكريا محسن، انت انسان طيب وإحنا كنا هنخرب لك المحل.

وابتهجت أم عبد الله وهى تراه يتحدث فى رزاة ووعى تام ويضحك مع صاحبه..

ولم يقطع حوارهم سوى دخول وفاء أخت عبد الله وهى تحمل فى يدها صينية عليها طبق من الحساء وقطعة من الدجاج وكوب من الشاى..

ووضعتهم أمام عبد الله على سريره وهى تقول له فى حنان وسرور واضح..

○ انت بقيت كويس يا عبد الله الحمد لله، لازم تاكل علشان انت لك طويلة نايم ومش بتاكل أى حاجة وجسمك ضعف جدا.

ابتسم إليها عبد الله ابتسامة خفيفة وكأنه يطمئنها بها على حالته وصحته.. وأخذ منها الصينية ثم تناول منها كوب الشاى فقط ليرتشف منه رشقات سريعه مع أنفاس سيجارته..

قطعة غيار انسان

ساد جو من الصمت وهـد ينظرون إلى عبد الله بينما كان هو مستغرقا فى النظر إلى ستف الحجرة وهو يدخن ويشرب الشاى.. فأراد محسن أن يقطع هذا الصمت ويضفى جوا من المرح على الجلسة..

○ تعرف يا عبد الله أنا نفسى أقدر أنام زيك كده.. على الأقل أرتاح من المشاكل.. والله انت فى نعيم.. فرد عليه عبد الله فى مرارة..

○ حتى النوم هتحسدنى عليه يا محسن.. مين قال لك إن أنا مرتاح.. أنا مش بنام أنا بعوت..
○ يا رجل تموت إيه بعد الشر عليك.. انت زى القل أهو.. ده إحنا افكرنا إنك..

○ افكرتوني اتجننت.. مش كده.. لا اطمنوا أنا عاقل جدا.. وأخذ مجدى يضحك ضحكا مصطنعا وهو ينظر إلى والدته وأخوته ليخفف عنهم هموم خوفهم عليه..

ولكن أمه لد تبادلـه الضحكات ولم يكن من الصعب عليها أن تكتشف أن ابنها يتصنع الضحك ليخفى ما بداخله من المتاعب والأحزان..

قطع غيار انسان

إن كلمته أنه لا ينام وإنما يموت جعلتها تشعر أن ابنها يبحث عن الموت والخلاص من حياته.. فهمست له قائلة:

○ يا عبد الله يا حبيبي علشان خاطرى كل.. كفاية سجاير ودخان وكل يا ابنى أى حاجة..

وفجأه فى رد فعل غير متوقع صاح عبد الله بأعلى صوته فى حالة هيستريا واضحة...

○ انتم عايزين منى إيه.. حتى السجاير عايزين تحرمونى منها.. كل ده علشان مش أنا اللي بدفع تمنها..

عايزين منى آكل وبس.. هو أنا حيوان فى نظركم عايش علشان الأكل.. حاضر.. ماشى.. أنا هريحكم وهاكل.. هو الإنسان هدفه ايه من الدنيا غير الأكل..

وراح يرفع طبق الحساء الساخن الملتهب ويشربه كله فى جرعة واحدة حتى أغرق ثيابه وفراشه..

ثم أمسك قطعة الدجاج فى عصبية واضحة وأخذ يحشو بها فمه ويحاول بلعها فى دفعة واحدة بعصبية شديدة.. وكأنه يريد أن يتخلص من هذا الطعام فيلقى به فى جوفه..

ولكنه لم يستطع البلع وأصابه اختناق أخذ يسعل بسببه

قطع غيار انسان

سعالا شديدا.. فأسرعت أخته نحوه بزجاجة من الماء فتناولها
وشربها حتى آخرها ثم ألقى بجسده على الفراش وهو يصيح
فيهم:

○ كفايه كده أنا تعبت.. سييوني واخرجوا.. أنا تعبنا وعايذ
أنا

وفى هذا التوقيت سمعوا طرقا على الباب فقام محسن مسرعا
وفتح الباب وهو يقول..

○ اتفضل يا شيخ رشدى أهلا وسهلا إحنا فى انتظارك من
بدرى.

كان شيخا فى حوالى الخمسين من عمره.. سمين البدن وله
كرش ضخم يمتد أمامه ويسبقه فى كل تحركاته..
يرتدى جلبابا أبيض قصير وله لحية طويلة متناثرة، وفى يده
عصا قصيرة غليظة..

لم يكن فى الحجرة مكان يتسع لضيف آخر.. فاضطرت أم
محسن للقيام من مكانها لتفسح مكانا ليجلس الشيخ رشدى
الذى خاطبهم فى وقار..

○ السلام عليكم ورحمة الله وبركاته.

- وعليكم السلام أهلا وسهلا يا فضيلة الشيخ.
- ايه الموضوع بالظبط؟
- عبد الله ابني يا شيخ اللي صابه صابه.. دائما نايم ولا بياكل ولا بيشرّب ولا بيخرج من الأوضة، وله فتره كبيره على الحال ده.
- هو بيصلى؟
- كان ساعات بيصلى لكن الفترة دي مش بشوفه يصلى.
- فرد الشيخ رشدى وهو يلقي بنظره على عبد الله الذى كان ملقى على فراشه وقد وضع ذراعه على عينيه وكأنه لا يشعر بما يدور حوله..
- يبقى طبعا الشيطان تسلط عليه ولبسه.. ده كفاية أوضته اللي مليانه بأعقاب السجاير.. ده أقل عقاب يحصل له لأنه إنسان فاسد بيعضب ربنا..
- فقال أم عبد الله وهى لا تتمالك نفسها من البكاء..
- أبداً والله يا فضيلة الشيخ.. ده ابني طول عمره مؤدب وطيب ويعرف ربنا وعمره ما أذى حد..
- وتدخل محسن قائلاً..

قطعة غيار انسان

○ بالراحة عليه شوية يا شيخ رشدى .. وعلى فكرة عبد الله فعلا طيب ومحترم لكن هو مر بظروف صعبة .. هو بس مقصر فى موضوع السجاير ده.

كان عبد الله يسمع حوارهم دون أن يتدخل فيه .. ولكنه على ذكر السجائر وجد نفسه يخرج سيجارة ويشعلها وهو نائم ولا يعرف لماذا يفعل ذلك .. ربما أنه يتحدى بها هذا الشيخ الذي يتهمه بالفساد والفسق ويقسو عليه رغم أنه لا يعرفه ولا يحيط بما فى داخله من الآلام ..

سأل محسن الشيخ رشدى قائلا:

- طيب هتعمل إيه دلوقت ي شيخ رشدى؟
- هقرأ عليه قرآن وإن شاء الله يخرج الجن منه.
- طيب وإيه العصايا اللي معاك دى؟
- دى علشان أضرب بيها الجن لو عصلج معايا.
- خد بالك يا شيخ رشدى أن عبد الله تعبنا ومش مستحمل.
- لا لا اطمئن هو مش هيحس بحاجة الضرب هيكون فى اللى عليه.

قطعة غير انسان

ثم نهض الشيخ رشدي من مكانه وجلس بجسمه الضخم على السرير حتى أحدث السرير أصواتا غريبة وكأنه على وشك الانهيار..

ووضع يده على رأس عبد الله وأخذ يتلو آيات من القرآن بطريقة سريعة متلاحقة ونبرة صوت حادة يغلب عليها الصراخ أكثر من الخشوع والسكينة.. وكأنه يخاطب بهذه الطريقة الجن والشياطين التي تسكن جسد عبد الله..

واستمر الشيخ رشدي هكذا لمدة أكثر من نصف ساعة، ولما لم يلاحظ أى تأثير أو تغيير على جسد عبد الله الذى كان متمددا وواضعا ذراعه على عينيه كما هو.. بدأ الشيخ رشدي يجذب يد عبد الله من على عينيه ويقول له بحدة فى لهجة الأمر:

○ نزل ايدك وبص فى عينيه

○ أبص فى عينيك ليه؟

○ علشان أخرجك يا ملعون.

○ هو انت تقدر تخرجنى من اللى أنا فيه.

○ طبعا أقدر أخرجك وأحرقك كمان يا ملعون.

○ ليه بتقول علىّ ملعون.. أنا أعرف ربنا زيك ويمكن أكثر.

قطعة غيار إنسان

- طيب يا ملعون المهم تخرج دلوقت.
- لو عايزنى أخرج هات لى تعب السنين اللي قضتها فى التعليم.. لو عايزنى أخرج رجع لى كرامتى تانى.. لو عايزنى أخرج يبقى هات لى وظيفه محترمة أو ساعدنى بمبلغ أعمل منه مشروع آكل منه رزق حلال.. ده لو انت بجد عايزنى أخرج من هنا.
- انت هستهبل.. انت هتخرج من جسمه يعنى هتخرج من جسمه.. انت اسمك إيه؟
- اسمى عبد الله.
- وهنا رفع الشيخ رشدى عصاه الغليظة وراح يضرب بها عبد الله وهو يقول:
- انت شيطان وكذاب ولازم تتأدب.
- ولكن العجيب أن عبد الله لم يقاوم هذا الضرب ولم يمسك هذه العصا التى راح يهوى بها الشيخ رشدى على جسده العليل..
- كان جسد عبد الله قد أصبح يتعشق الألم لعله يجد فيه الخلاص من حياته الثقيلة التى لم ينجح فى الخلاص منها عن طريق النوم.. لذلك لم يحاول الدفاع عن نفسه..

قطع غيار انسان

نزل الشيخ رشدى من على السرير وهو يلهث كى يلتقط أنفاسه بعد هذا المجهود الشاق خصوصا على شخص بدين مثله..

وقف على الباب يخاطب أم عبد الله الذى سمعه وهو يقول..

- هو ه يحتاج جلسة تانية لأن معمول له سحر سفلى.
- يا ساتر يا رب.. أرجوك يا شيخ رشدى مش تتأخر عليه.
- حاضر.. الله المستعان.
- طيب يا شيخ رشدى حضرتك عايز كام؟
- فارتفع صوت الشيخ رشدى وهو يقول فى غضب وانفعال..
- أعوذ بالله.. انتى بتقولى إيه يا ست انتى.. أنا مش باخد حاجة ده كله لوجه الله..
- ثم خفض طبقة صوته فجأة وأخرج من جيبه زجاجة صغيرة وهو يقول..

○ أنا برفض إنى آخذ أجره يا أم عبد الله.. انتى بتدفعى خمسين جنيه بس تمن الزجاجة دى لأن فيها زيت زيتون وعطر مخصوص مقروء عليه يعنى والله مش جايب تكلفة الزجاجة.

قطع غيار انسان

- حاضر يا عم الشيخ تحت أمرك.
- ياللا يا ستى كله لوجه الله.
- فذهبت أم عبد الله إلى أخته وفاء وهمست في أذنها..
- معاكى خمسين جنيهه بسرعة؟
- فسمعها عبد الله وهى ترد على أمها..
- معايا خمسين جنيهه كنت شايلاهم لإيجار الشقة.. خديهم اهم
- وهنا قفز عبد الله من على سريره قفزة بهلوانية حتى أصبح
- فجأه فوق الشيخ رشدى ممسكا بعنقه حتى أسقطه على الأرض
- وحنقه حنقا شديدا وهو يقول له..
- أنا اللى لازم أخرج روحك من جسمك يا نصاب.. جاى
- تضربنى وكمان تاخذ إيجار بيتنا.. القرآن برىء منك ومن
- أمثالك يا ملعون.
- كفايه يا عبد الله الرجل هيموت فى ايدك.. كفاية مش
- ناقصين مصايب.
- وبصعوبة بالغة استطاعوا أن ينفذوا الشيخ رشدى الذى أسرع
- ليخرج من البيت هاربا بعد أن تمزقت ثيابه وكاد أن يلغظ
- أنفاسه فى هذا البيت.

قطعة غبار انسان

وأخذوا يهدؤون من ثورة عبد الله الذى كان فى حالة هياج شديدة.

○ هو عارف إن أنا مش ملبوس.. وكذب عليكم علشان ياخذ فلوسكم.. ده مش شيخ ده نصاب.. نصاب..

○ يا ابنى الجن موجود ومذكور فى القرآن.

○ أنا عارف أن الجن موجود وعارف إنه ممكن يلبس الناس..

ويا ريته كان لابسنى كنت عرفت سبب اللى أنا فيه وارتحت.. لكن انا مش ملبوس.. مش ملبوس.

○ طيب اهدى يا عبد الله خلاص الموضوع خلص.

○ انتم السبب فى كده.. هو مش غلطان.. سيبونى أنام ، سيبونى واطلعوا بره.

وانتهت الليلة بهذه الأحداث المرة.. وخرج محسن وهو يودع

أم عبد الله وأسرتة ويحاول أن يجد فى جعبته حلا لإنقاذ صاحبه..

○ على فكرة عبد الله عنده حق واحنا اتصرفنا غلط.

○ إزاي يا بنى!

○ هو مش ملبوس ولا حاجة هو كده محتاج دكتور نفسانى.

قطع غيار انسان

- واحنا هنعمل إيه بس.. إذا كان هو مستحيل يخرج من الأوضة.. هنوديه إزاي لدكتور أو مستشفى..
- فقلت وفاء وقد انهارت قواها ولم تتمالك نفسها من البكاء.
- يعنى إيه.. أخويا مش مجنون.. حرام عليكم.. حرام عليكم.
- لا يا وفاء عبد الله مش مجنون ولا حاجة.. أنا أقصد أن سبب تعبته مرض نفسى بسبب ظروفه الصعبة.. وعادى لما يشوفه دكتور نفسانى ,ده مش عيب، اذا كان أرقى وأغنى الناس بيتعالجوا عند دكاترة نفسانيين.
- يعنى نتصرف إزاي يا محسن؟
- مش تشغلوا بالكم أنا هتصرف بكرة إن شاء الله..

قطعة غبار إنسان

وفى اليوم الثانى بينما كانت أم عبد الله وأخته وفاء جالستين حوله فى حجرته يحاولان أن يخرجاه مما هو فيه..
دخل عليهم محسن وهو مصطحب فى يده دكتور رؤوف إخصائى الطب النفسى..

كان رجلا طويلا ونحيفا بارز العينين.. ترتجف كفه بطريقة ملحوظة.. حاد فى تصرفاته وانفعالاته.. يبدو عليه وكأنه يعانى من قلق وتوتر ربما من كثرة اختلاطه بأصحاب المرض النفسى..
فقامت أم عبد الله وأخوته يفسحون له الطريق حيث توجه مسرعا وجلس بجوار عبد الله على سريره..

○ هو اسمه إيه يا محسن؟

○ قلت لك يا دكتور كذا مرة اسمه عبد الله.

○ آه طيب.. قوم يا عبد الله عايز أدرش معاك شوية.

لكن عبد الله لم يرد عليه واكتفى بأنه ألقى عليه نظرة عابرة ثم حول وجهه عنه وراح يحملق فى سقف الحجره مما جعل محسن ينادى على عبد الله..

○ يا عبدو.. إيه يا عم مش ترد على الضيف.. الرجل عايز يتكلم معاك شوية.

قطعة غيار انسان

- أنا مش عايز أتكلم مع حد.
- فهمس الدكتور رؤوف فى أذنه..
- طيب قولى يا عبد الله إيه اللى مزعلك.. أنا عايزك تفضفض لى يمكن أقدر أساعدك.
- محدش يقدر يساعدنى غير ربنا.
- طيب عايز ربنا يساعدك إزاي قولى؟
- ياخذنى ويخلينى أموت وأخلص.
- طيب ليه يا عبد الله.. الدنيا مليانة حاجات حلوة كتير.
- أنا مش معايا فلوس أشترى الحاجات الحلوة دى.. كل إنسان فى الدنيا دى لازم يكون ليه مكان يقبض منه فلوس ما عدا أنا.
- ونهض عبد الله من رقادته حتى استوى جالسا وأخذ يتكلم فى حماس وقد شعر برغبه ملححة أن يشرح بعضا من نظرياته الفلسفية.
- تخيل يادكتور ان هدف الناس من الحياة دى هو الاكل..
- معقوله ياعبد الله.. الأكل بس !!
- ايوه صدقنى كل الناس بتتحرك علشان الفلوس.. والفلوس يشترو بيها الاكل.

قطعة غيار انسان

- ايوه , لكن فى أهداف تانية غير الاكل.. يعنى الشهرة مثلا، أو المنصب ، أو الجواز.. يعنى يا عبد الله الأهداف كثير.
- كلها صدقنى فى النهاية مجرد طرق للأكل.. يعنى الشهرة أو المنصب كل ده مجرد طرق علشان الإنسان يحصل على أكله بسهولة لأنه غنى أو مشهور.
- طيب وهدف الجواز إيه علاقته بالأكل؟
- حتى الجواز يا دكتور.. الإنسان بيتجوز علشان يكثر نسله ويفضل له وجود على وجه الأرض.. وده ليه لأن الأرض فيها أكله وشربه.. يعنى برضه الهدف هو الأكل.. فانفجر الدكتور رؤوف فى الضحك وهو يقول:
- طيب ماشى يا عبد الله.. أنا اقتنعت بكلامك.. فيها إيه بقى أنك تعيش من أجل الهدف ده.. يعنى تجيب أكلك زيك زى باقى الناس.
- قصدك زى الحيوانات.. انت كده يا دكتور زى الحيوان بالظبط.. تقدر تقولى إيه الفرق بينك وبين الحيوان.. سواء الإنسان أو الحيوان.. الاتنين عايشين علشان بطنهم.

قطعة غيار انسان

وصمت الدكتور وقد شعر بالإهانة والحرج من كلمات عبد الله
الذى واصل حديثه قائلاً:

○ عمرك يا دكتور جربت الشعور ده؟

○ شعور إيه؟

○ إنك تكون طفل وما فيش لك حد يعطيك مصروف.. ولما تكبر

يكون ما فيش لك أى مكان تقبض منه فلوس.. عمرك جربت

الإحساس ده؟؟

○ كلنا تعبنا يا عبد الله فى حياتنا لكن بعد كده ربنا مش

بينسى حد.

○ أهو علشان كده أنا نفسى أخلص من التعب ده وأروح عند ربنا..

وقام الدكتور رؤوف يائسا وهم بالانصراف فوقف معه محسن

وأم عبد الله على باب الغرفة.

○ عنده إيه يا دكتور؟

○ حالة اكتئاب وشيزوفرنيا واضحة.

○ طب والحل يا دكتور؟

○ محتاج لجلسات متكرره وأنا هكتب له على دوا مهدأ هيخليه

ينام كويس.

قطع غيار انسان

- لا يا دكتور اعمل معروف.. ده هو على طول نايم.. احنا عايزينه يصحى ويفوق،
- آه طيب أنا هكتبله شوية فيتامينات ومضادات للاكتئاب.
- شكرا يا دكتور.. حضرتك عايز كام الفزيتا؟
- خمسمائة جنيه بس
- يااااه كتير يا دكتور.
- كتير إيه يا محسن.. انت عارف إن أنا علشان أسيب العيادة وآجى لمنطقة زى دى يكلفنى كام.. ده علشان خاطر انت بس.
- وبينما كان محسن يخرج النقود من جيبه ليعطيها للدكتور.. نادى عليه عبد الله..
- يا محسن اطرده الرجل ده بره.. ده نصاب زى أخوه بتاع امبارح.
- عيب كده يا عبد الله.. انت مالك أنا اللى هدفعه.
- فنزل عبد الله من على سريره وأمسك بكوب زجاجى وقذفه فى اتجاه الدكتور رؤوف الذى انحنى بسرعة ليتفادى الكوب الذى اصطدم بالحائط وتناثر على الأرض..

قطعة غيار إنسان

وراح عبد الله يحاول أن يمسك بالدكتور وهو يصيح..
○ ده دكتور نصاب.. فاكربن أنا المكان اللي هيقبض منه
فلوس.

.. يعنى فى الآخر طلعت أنا الخزنة اللي جاى ياكل منها
الحيوان ده..

وصرخت أم عبد الله وهى تدفعه إلى الوراء..
○ كفاية بقى فضايح.. حرام عليك يا ابنى اللي بتعمله فينا..
يا ابنى احنا عايزين نعالجك حرام عليك.
فى يوم مشمس صحو قامت أد عبد الله فى الصباح وأعدت له
فطورا ساخنا.. طبقا من الفول وبعض حبات الطعمية الساخنة
وكوبا من الشاي..
ودخلت إليه الغرفة وفى يدها صينية الطعام وفى اليد الأخرى
صحيفة الأخبار..

وتعجبت أم عبد الله أنها لأول مرة تجده مستيقظا وجالسا
على فراشه فى هذا التوقيت..
انشرح صدرها ووضعت له الطعام أمامه ثم فتحت نافذة
الحجرة فانهمر الضوء يملأها..

قطع غير انسان

تبسم لها عبد الله وراح يتناول الطعام فى سكينة غير معتادة..

جلست بجواره ورتبت على ظهره فى حنان..

○ اسم الله عليك يا ابني.. انت النهاردة زى الفل..

○ أنا كمان حاسس إن أنا خفيت.

○ ولسة يا عبد الله هتخف كمان لما تقرأ الإعلان فى الجرنال

ده.

○ إعلان إيه؟

○ ده إعلان عن وظيفة... دول طالبين خريجين كلية التجارة ودفعتك كمان.

○ تانى يا أمى.. تانى.

○ لا يا عبد الله.. المرة دى وظيفة حكومى يعنى رسمية.. مش

صاحب شركة يستغلك ويتحكم فيك.. علشان خاطرى يا

ابنى.. روح جرب حظك.. مش مهم تقبل أو لا.. المهم أنك

تخرج.

○ طيب سيبينى دلوقت لو سمحتى.

وقام عبد الله فأخذ حماما باردا.. وحلق ذقنه.. ثم أخذ ينتقى

أحسن ما عنده من الثياب ويبحث عن زجاجة برفان عتيقة كان يضعها فى صندوق أسفل سريره من زمن بعيد..

كادت أمه تطير من الفرح وهى تراه خارجا من حجرته نظيفا متعظرا مرتديا ثيابه يودعها بابتسامة رقيقة..

وبالفعل كان الحظ حليفه.. ونجح عبد الله فى مسابقة الوظيفة..

وأصبح موظفا حكوميا فى الدولة.. كان راتب الوظيفة ضعيفا ولكنه كان يكفيه شعوره بالأمان.. لقد أصبح يشعر أنه يسند ظهره إلى حائط قوى صلب ويستظل بشجرة لها جذور راسخة فى الأرض..

لم يعد هناك من يهدده بالفصل وقطع الأرزاق.. فالتعامل فى الوظيفة الحكوميه قائم بين الموظفين على مبدأ اللوائح والقوانين.. وليس على مبدأ مجرد الاستظراف من صاحب العمل للعامل الذى عنده.. فياويل العامل فى القطاع الخاص إن كان دمه ثقيلًا على قلب صاحب العمل..

قطعة غير انسان

أخيرا نجا عبد الله من سخرة القطاع الخاص وأصبح موظفا
فى القطاع العام..

إن لكلمة القطاع العام والوظيفة الحكومية سحرا خاصا فى
نفس المواطن العربى..

لأن بجانب المرتب الضعيف توجد هناك امتيازات كثيرة..
فهناك تأمين حقيقى على صحته وطرق قانونية يحصل بها على
العلاج والدواء المجانى المدعوم من الدولة..

كما أن هناك علاوات وحوافز ثابتة لا تتغير، وهناك مكافآت
نهاية الخدمة وهو مبلغ ممتاز من الممكن أن يمارس به أى
مشروع..

ويكفى أن له معاشا سوف يظل يحصل عليه فى شيخوخته
وينتفع به أولاده من بعده..

وبدأت حياة عبد الله تتحسن وتشعر أسرته بالاستقرار..

○ شد حيلك يا عبد الله يا ابنى.. انت كبرت وعايزين نختار
لك عروسة ونجوزك وأفرح بيك.

○ إن شاء الله يا امى، أنا ممكن أعمل طلب قرض وآخذ مبلغ
مش بطال.

قطع غير انسان

- وينفع ده قانونا يا عبد الله؟
- طبعا أنا لى فى الوظيفة أكثر من أربع سنين ومن حقى آخذ قرض حسن طويل الأجل.
- فى اليوم التالى كان عبد الله جالسا على مكتبه وهو يسأل زميله فى العمل..
- أنا عايز أقدم على قرض يا إبراهيم.. ياريت تعرفنى أقدمه لمن وأجيب طلب القرض إزاي؟
- قرض إيه بس يا عبد الله.. انت معرفتش الكارثة الللى نزلت علينا
- كارثة إيه على الصبح , خير؟
- الشركة بتاعتنا اتخصصت
- يعنى إيه اتخصصت يا إبراهيم؟
- يعنى اتباعت لواحد مستثمر وهتبقى قطاع خاص.
- فانتفض عبد الله واقفا وقد أصابه الفزع..
- إيه الللى انت بتقوله ده.. ده مستحيل.. دى شركة قطاع عام يعنى ملك الحكومة، يبقى اتباعت إزاي!
- ما هي الحكومة الللى باعتها يا عبد الله.. باعتها لواحد غنى

قطع غيار انسان

من رجال الأعمال المستثمرين ودى مش أول شركة حكوميه
تتباع على فكرة.

○ طب واحنا مصيرنا إيه؟؟

○ يا عالم بقى.. صاحب الشركة الجديد ياما يطردنا ياما
يخلينا.. وممكن يسرح نصنا فى الشارع ويخلى اللى هو
عايزهم بس.. ربنا يستر.

وبالفعل حدث ما كان يتخوف منه عبد الله فقد تم فصله
مع مئات العمال الذين تم فصلهم من الشركة بحجة أنهم زيادة
وعبء على حاجة العمل..

ولم يحصلوا على أى مستحقات أو مكافئات لهم وانتهت كل
آمال عبد الله وتبدد حلم المعاش..

وشعر بالضياع فقد كانت هذه عاشر وظيفة يخسرها بعد أن
يلتحق بها بعناء ومشقة.. ووجد نفسه يسير فى مقدمة العمال
الثائرين المطالبين بحقوقهم الضائعة..

وفى لحظات الغضب تقاذفت بعض الحجارة على نوافذ
الشركة.. كانت الأنفوس الغاضبة والأيدى التى تعبت من كثرة
العمل على استعداد لعمل أى شىء للتأثر لكرامتهم..

قطعة غيار إنسان

فما أصعب جرح كرامة العامل عندما يجد نفسه مطرودا في الشارع وممنوعا من دخول الصرح الذى بناه..
وفى دقائق معدودة تطورت الأحداث بسرعة ليتحول الموقف إلى عربات شرطة تحيط بالجموع الذين أصبحوا مخربين بعد أن كانوا عمالاً وموظفين..

ووجد عبد الله نفسه فى قسم الشرطة هذه المرة بتهمة التجمهر والتخريب لمنشآت عامة..

نظر إليه ضابط الشرطة من بين باقى المحجوزين وراح يتأمله..

○ انا شفتك فىن قبل كده.. شفتك فىن... شفتك فىن..

وصمت عبد الله وهو يبتلع ريقه خوفا من أن يتذكره الضابط فيضعه فى خانة مريرة اسمها.. (السوابق)، وتكون النتيجة أن يعامل معاملة المجرمين وينفقد الأمل فى الخروج من هذه القضية..

ثم راح الضابط يواصل أسئلته له..

○ انت اسمك إيه؟

○ اسمى عبد الله.

قطع غيار انسان

- انت متعلم يا عبد الله؟
- أنا بكالوريوس تجارة.
- انت حدفت طوب على الشركة يا عبد الله؟
- لا أبدا يا أفندم أنا كنت بهتف بس.
- وإيه اللي مشاك مع الناس دي وكنت بهتف ليه؟
- وأخذ عبد الله يسرد له مشكلته وكيف أنه تم خصخصة الشركة وتم فصله هو ومئات العمال.. وفجأة قاطعه الضابط..
- أيوه.. افكرت.. مش انت اللي كنت ممسوك عندي من فترة في قضية ضرب رئيس قسم في شركة تانية؟
- وشعر عبد الله بدوار في رأسه وانها العرق من جبينه ولم ينطق بكلمة وهو يرى الضابط يقوم من على مكتبه ويتجه نحوه ويسأله في عصبية..
- اتخرست ليه.. انطق.. انت ولا مش انت؟
- لا لا مش أنا.
- طيب خده يا مغاوري واعمله فيش وتشبيهه حالا.
- لا بلاش مغاوري , أيوه هو أنا
- ده انت متخصص بقي.. احكى لي إيه حكايتك بالصبط.

ولم يجد عبد الله مفرا سوى أن يحكى للضابط كل قصته من بدايتها بكل ما فيها من آلام وأوجاع..

وعلى عكس ما كان يتوقع عبد الله من هذا الضابط صاحب الصوت الأجنس والملامح القاسية والشارب الغليظ الأحمر.. وجد منه تعاطفا وقلبا رقيقا جدا يختبئ خلف هذا الوجه المتجهم..
 ○ ياخبر يا عبد الله.. أنا مشفتش حد فى الدنيا حظه وحش زيك.

○ رغم إنى من صغرى متفائل جدا وكنت بتخيل إنى هوصل لأعلى مكان.

○ ما هو انت هنا أهو فى أعلى مكان.. هو فى أعلى من قسم الشرطة يا رجل..

وضحك الضابط بشدة وضحك معه عبد الله ضحكا ممزوجا بمرارة..

○ المشكلة يا عبد الله إننى مصدقك ونفسى أساعدك لكن لازم أنفذ القانون.

○ نفذ يا أفندم نفذ.. كده كده أنا انتهيت.

○ على العموم يا عبد الله أنا بردو هقف جنبك.. هعمل لك

قطعة غيار إنسان

محضر يطلعك من القضية براءة.. وهجرك كام يوم وتخرج بكفالة بسيطة.

○ متشكر يا أفندم.

○ خده يا مغاوري على الحجز.. اتفضل معاه يا عبد الله.

فأخذه مغاوري من يده بطريقة مهذبة وبدون كلابشات على غير عادته مع باقى المتهمين وقد لاحظ اهتمام الضابط به وتعاطفه معه..

وقبل أن يخرج عبد الله من غرفة التحقيق التفت إلى ظابط المباحث قائلاً فى نبرة استعطاف..

○ أرجوك يا أفندم طلب واحد بس من فضلك.

○ خير يا عبد الله عايز إيه؟

○ ياريت تحبسنى حبس انفرادى فى زنزانة لوحدى.

○ وليه كده يا بنى.. ده احنا بنعاقب المسجلين خطر بالحبس الإفرادى ده!!

○ حضرتك بتعاقبهم بكده بعد ما بيكونوا خلصوا على الغلابة اللى زى حالاتى فى الزنزانة الجماعية..
فارتفع صوت الضابط بضحكات عالية..

قطع غيار انسان

○ ما هو أنا ممكن أوصي عليك فى الحجز أن محدش يكلمك أو يضايقتك .

○ لا يا أفندم أرجوك .. لو وصيت علي فى الحجز هيقولوا معايا واسطة ويكرهونى والطريحة هتزيد .. حضرتك مجربتش نظام الحبس .

○ خلاص يا عبد الله انت كمان هتحبسنى .. زى ما تحب يا سيدى .. خده يا مغاورى على الحبس الانفرادى .

وخرج عبد الله من الحجز بعد أن دفع الكفالة .. وسار فى الطريق المظلم فى هذا الحي الصامت الهادئ الذى يوجد به قسم الشرطة ..

وأخذت الأفكار والوساوس تتلاحق فى رأسه .. يا ترى ماذا سيكون مصيره .. وإلى أى مكان سيذهب الآن .. هل يعود إلى أمه واخوته الصغار بخيبة أمل للمرة المليون ..

وماذا سيفعل عندما يعود .. هل سيرتمى كالجثة المتعفنة مره أخرى على سريره؟ ..

وراح منظر غرفته وسريره وأيام مرضه يتمثل فى ذهنه ومخيلته ..

قطع غيار إنسان

وأخذ يعذب نفسه بهذه الأسئلة.. ما ذنب أمه المسكينة أن ترعى وتنفق على فاشل مثله.. ما ذنب أخته وفاء التي تشقى وتعمل لتطعمه وهو نائم كسيح..

ما ذنب أخوته الصغار الذين سيتعذبون برؤيته مريضا ومجنونا، بدلا من أن يكون لهم مكان أبوهم الذى مات وتركهم صغاراً..

لماذا لا يبقى هنا فى الشوارع يلتقط طعامه من المزابل كالكلاب الضالة.. وينسى أهله وأصحابه ومع الزمن سينساه الناس جميعاً.. فما قيمته أو جدواه حتى يبحث الناس عنه..

كان أشد ما يعذبه هو توقعه وانتظاره لهذه الحالة المرضية التى نزلت به قبل ذلك فى كارثه أقل بكثير مما هو فيه الآن.. هذا الشعور بأن صداع مزمن يهبط على رأسه فجأة، ودوار عنيف يجره إلى الأرض جرا ويدخله فى عالم النوم رغما عنه..

إن هذا الشعور لابد أنه سأتية ويحل على رأسه الآن.. فهى أزمة مرضية تصاحبه كظله عند حدوث أى فاجعة له.. وأى فاجعة أكبر مما هو فيه..

قطع غيار انسان

ولكن الغريب أن هذه الحالة لم تأتته ولم تنزل به كما كان يتوقع .. فكان عبد الله يقول في نفسه ربما سأشعر بهذا الدوار الملعون بعد قليل أو بعد ساعة أو ساعتين ..

ولكن مرت ساعة وساعات وأيام لم يصبه أى دوار أو مرض ..

لم يكن يعرف أن جسده ونفسيته قد أخذت مناعة وتبدلت أمام الصدمات من كثرة ما تعرض لها واعتادت عليها .. لقد أصبح فى نفسه مثل التطعيم واللقاح ضد الانهيار أمام هذه الكوارث .. فتعجب عبد الله أنه وجد فى نفسه قوة وصلابة لم يكن يعتاد عليها ..

سارت أحداث الحياة بعبد الله رغما عنه كالقطار الذى يجرى بالراكب دون استئذانه ..

وهداه تفكيره إلى أن يعمل مشروعاً خاصاً به ..

فإن سنه قد كبرت وأصبحت فرصته فى الحصول على وظيفة حكومية أخرى شبه مستحيلة .. وقد جرب حظه فى القطاع الخاص أكثر من مره وفشل فيه وكانت دائماً عاقبة عمله السجن ..

قطع غيار انسان

فلماذا لا يصنع هو مشروعا صغيرا يكون هو سيده ومالكة دون أن يتحكم فيه أحد سواء الحكومة أو المستثمرين أصحاب الشركات..

- إيه رأيك يا أمى أنا فكرت أعمل مشروع صغير لحسابى.
- مشروع إيه يا عبد الله؟
- هعمل عربية بيع هدوم وأقف بيها فى العتبة.
- طيب وهتجيب يا ابنى الهدوم منين.
- سهلة.. هسافر بورسعيد أجيب من هناك الهدوم الباله والرخيصة وأرجع بيها هنا وأبيعها على عربيتى.
- لكن يا ابنى انت متعلم ومعاك شهادة.. يعنى دى آخرتها.
- مش مهم يا أمى الكلام ده دلوقت المهم هجيب منين تكلفة العربية وتمن الهدوم.
- أختك وفاء معاها قرشين من شغلها ممكن تسلفك، وأنا يا ابنى لو معايا مش هتأخر عليك انت عارف..
- كتر خيرك يا أمى.. فلوس وفاء مع قرشين هاستلفهم من محسن ممكن يعملو المشروع.

قطعة غيار إنسان

وبالفعل أصبح عبد الله يمتلك عربية متجولة ومعلق عليها
أنصاف من الملابس الحریمی وملابس الأطفال يقف بها في
ميدان العتبة..

ولم يصل عبد الله إلى هذا الانجاز بسهولة.. وإنما كان بعد
مغامرات شاقة في تكملة المبلغ المطلوب والسفر إلى بورسعيد
مرات ومرات..

وشراء العربية - النص عمر - وآلاف التذلات والتوسلات
لكبار التجار المسيطرين على حركة البيع والشراء في العتبة كي
يمنحوه مكان - نمره - بجوار الرصيف كي يقف عليه وقد
اتضح له أن الوقوف على رصيف في العتبة أصعب من الوقوف
على رصيف سوق بورتا بورتيزى في إيطاليا..

في وسط زحام العتبة.. والضجيج المتلاحق الذي لا يهدأ ليلا
ولا نهارا..

آلاف الناس يذهبون إلى هناك يوميا في شكل كتل بشرية ملتحمة
لا تستطيع أن تفصل جسد إنسان عن الآخر من شدة الزحام..
عيون الزبائن طائشة متقلبة تتلفت سريعا هنا وهناك بحثا عن
أى سلعة رخيصة يكون في استطاعتهم شراؤها..

قطع غيار انسان

والفصال هناك وشجار الزبائن مع البائعين أمر معتاد جدا.. بل هو من لوازم وضروريات هذه الرحلة التسويقية.. فلا بد للزبون من الكفاح حتى يحصل على أقل تخفيض فى السعر.. فإن الجنيه وربع الجنيه مهم جدا عند هذه الطبقة الفقيرة.. ولا بد للبائع من المحاولات المستميتة للحصول على أعلى ربح ممكن يعود به لأولاده..

وفى النهاية يرضى المشتري بأقل سلعة طالما أنها رخيصة.. ويرضى البائع بأقل ربح المهم أن لا يرجع إلى أولاده خالى الجيوب صفر اليدين. وهكذا هى العتبة..

ولم يجد عبد الله حلا لكى يعلن عن وجوده وينجح فى بيع بضاعته أمام هذا الصخب الهائل سوى أن يشتري مكرفونا ويقف فوق عربته ويتخلى عن كبريائه ثم يتراقص ويقفز فى بهلوانية وهو يزعم فى الميكرفون بهذا الهتاف الشهير..

○ باتنين ونص.. وتعالى وبص!!

وانغمس عبد الله فى حركة البيع والشراء يربح أحيانا ويخسر أحيانا، ودارت عجلة الحياه بعبد الله وقد أصبحت عربة الملابس هى كل شىء فى حياته..

حتى أتى ذلك اليوم الذى رآها فيه.. لم يكن يعرف أن هذه الفتاة ستقلب حياته رأسا على عقب وأنها ستأخذه إلى طريق لم يخطر بباله فى يوم من الأيام..

بينما كان هو منهمك فى البيع للزبائن لاحظ هذه الفتاة التى تقف بين الزبائن أمام عربته.. كانت تقلب فى الملابس الحریمی الموجودة أمامها.. مع أن لها هيئة أرستقراطية توحى بأنها من طبقة ميسورة الحال.. ولا يناسبها أبدا هذا النوع من الملابس البسيطة التى تحمل جميعها ماركات مجهولة الصنع..

لفت نظره ثيابها التى ترتديها والتى يبدو أنها من أغلى وأجود الماركات.. وبشرتها البيضاء الناعمة التى توحى بأنها من أهل الترف والرفاهية..

رفعت عينيها إليه بعد أن تأكدت أنه ينظر إليها منذ فترة , وقالت له فى رقة مبالغ فيها وهى تشير إلى كوم من الملابس قد وضعت يدها عليه..

○ أنا اخترت دول حلوين.. بكام؟

فأطلق عبد الله ثمنا مرتفعا كعادة البائعين ظنا منه أنها ستجادل معه فى السعر.. ولكنها أخرجت من حافظة نقود

قطعة غير انسان

ذهبية اللون كانت في يدها مبلغا كبيرا وأعطته له..

○ دول كتير يا هانم.. ثواني أجيب لك الباقي

○ لا خلاص شكرا، دول علشانك

وانصرفت وهى تبتسم له بعينها إبتسامة حلوة يملأها
الإعجاب..

أخذ عبد الله يرقبها ببصره بعد أن انصرفت حتى غابت عنه
فى الزحام..

وظل عبد الله يفكر فيها طوال يومه.. ترى من تكون هذه
الفتاة صاحبة العيون الصافية الجميلة، ولماذا تشتري منه بهذا
السخاء غير المعتاد فى مثل هذه الأماكن..

وبعد يومين بينما كان عبد الله يقفز ويصيح فوق عربته ويعلن
عن بضاعته رآها من بعيد مقبلة نحوه مرة أخرى.. لم يصدق نفسه
وفرك عينيه فى اندهاش حتى اقتربت وتأكد بالفعل أنها هى..
استقبلته بضحكة عذبة وكأنها أتت لتكلمه وتتعرف عليه لا
لتشتري منه..

○ أنا خلاص بقيت زبونتك وباين على أدمنت الحاجات
بتاعتك.

قطع غير انسان

فتح عبد الله فمه وعينيه فى ذهول وهو لا يصدق أن هذه الفتاة الجميلة تحدثه هو.. ثم حاول أن يستجمع أحلى ما عنده من كلمات..

○ أنا تحت أمرك والبضاعة كلها تحت أمرك يا ست الكل..
دقيقة واحدة هجيب لك حجة ساقعة.

○ لا لا ميرسى جدا أنا مش فاضية , أنا عايزاك تختار لى كذا
طقم على ذوقك وتأخذ اللى انت عايزه .

فنزل عبد الله من فوق العربة وهو يشيح بيده لباقى الزبائن
فى إشارة توحى لهم أنه غير مستعد للبيع لهم أو الحديث
معهم الآن..

مما دفع امرأة منهم أن تقول له فى غضب وغيره واضحة :
○ واحنا مش عاجبين يعنى ولا إيه ، لو مش عايز تبيع لنا
فى غيرك.

○ يا ريت يا ست أنا مش فاضيلكم دلوقت , اتكلو على الله
مع السلامة.

وبالفعل انصرف الزبائن من أمام عربة عبد الله ليقف وحده
مع هذه الفتاة التى سلبت منه عقله ومشاعره..

قطع غيار انسان

وأخذ ينتقى لها أجود ما عنده من هذه البضاعة الرديئة ويعرضها عليها بطريقة أصبحت أقرب للغزل وليس للبيع والشراء..

○ إيه رأيك يا هانم فى الطقم ده ، لونه غامق وعلى بشرتك البيضاضا هيبقى تحفة.

○ تعرف أن ذوقك حلو.

وتاه عبد الله فى عذوبة صوتها والحديث معها .. حتى أنه لم يطلب سعرا محددًا لبضاعته عندما سألته عن ثمنها ، وكان على أتم الاستعداد أن يعطيها كل بضاعته مجانًا .. فقد منحته شعورا لا يقدر عنده بثمن ولذلك اكتفى بكلمة..

○ اللي تجيبه يا هانم.

وكما حدث فى المرة السابقة دفعت له ثمن الملابس وفوقها زيادة كبيرة ثم فاجأته بما لم يكن يتخيله..

○ ده رقم موبايلى سجله عندك .. أنا ممكن أحتاج منك حاجات كتير قصدى يعنى أطقم وهدوم..

○ أسجل الاسم إيه؟

○ ندا.

قطعة غيار انسان

وانصرفت من أمامه .. ولا يعرف عبد الله كيف ترك بضاعته
وعربته ومشى خلفها دون أن تشعر..

فقد كان يشعر بغموض وجاذبية فى هذه الفتاة تدفعه إلى أن
يعرف عنها أى شىء.. وبالفعل قد زاد الغموض عنده والحيرة
عندما رأى ندا تعبر الطريق المزدحم ثم تتوجه نحو سيارة حمراء
أحدث موديل وتفتحتها ثم تلقى بما معها من حقائب فى المقعد
الخلفى.. وتقود سيارتها وتنصرف..

زادت التساؤلات فى عقله.. ما السبب فى أن هذه الفتاة
الجميلة الثرية تشتري ثيابا من الباعة المتجولين فى العتبة..
وما سبب اهتمامها به..

إن عنده شعور يقينى أنها تبادله الإعجاب.. فكيف لفتاة فى
هذا المستوى أن تعجب ببائع متجول مثله.. ولكن عقله سرعان
ما وجد إجابة لكل أسئلته..

إنه شاب متعلم وله قدر من الوسامة والرجولة الواضحة..
ولابد أن تكون هذه الحسناء لماحة وذكية جدا فربما تكون
قد أتت مرة لميدان العتبة لغرض معين غير شراء الملابس أو
ربما تكون صاحبة بوتيك قريب من هذا المكان فرأته بالصدفة

قطعة غيار انسان

فأعجبت به ولم تقاوم جاذبيته .. فأصبحت تتردد عليه بحجة شراء الملابس ..

وبغض النظر عن خطأ كل تحليلات عبد الله لكن المهم أنها انصرفت وقد احتلت عقله ووجدانه.

لم يعكر صفو حياة عبد الله سوى هذه المصائب التي تبحث عنه من فترة لأخرى وكأنها بالون عقده القدر بقدميه بحبل .. تسير خلفه حيث سار ..

فقد اختلت منظومة تجارته عندما تم القضاء على السوق الحرة فى بورسعيد .. وفقد المكان الذى كان يجلب منه البضائع السهلة الرخيصة ..

واضطر عبد الله أن يقترض ويستدين من التجار حتى يستطيع الحصول على بضاعة من موارد أخرى أغلى فى أثمانها من بضائع بورسعيد بكثير ..

وحدث ما لم يكن فى حسبانته .. بينما كان فى ليلة واقفا على عربته يبيع للزبائن فوجئ بالجميع يجرى فى فزع ويهرول من حوله ..

قطعة غيار إنسان

كانت كلمة (البلدية) بمثابة قنبلة بمجرد أن تنطلق حتى يفزع جميع التجار ويسرع كل واحد بأن يجمع بضاعته في صرة على ظهره ويفر هاربا..

لم يكد عبد الله يستوعب ما يحدث ويبدأ في جمع بضاعته حتى فوجئ بسيارة الشرطة وسيارة البلدية تقف عنده.. وفي لمح البصر قفز رجال البلدية والحى وحملوا بضاعته وعربته الخشبية وألقوها في صندوق سيارة البلدية.. وتم إلقاء القبض عليه وقذفوه داخل سيارة الشرطة..

اندهش ضابط المباحث وهو يرى عبد الله أمامه للمرة الثالثة وقد تم القبض عليه بتهمة إشغال الطريق العام..

○ إيه يا عبد الله حكايتك هو أنا مش ورايا غيرك.
○ أنا مش عارف يا فندم الحكومة على طول زعلانة منى ليه.
○ برودو يا عبد الله كده.. انت رجل متعلم وخريج كلية تقبل على نفسك تخالف القانون وتشتغل ببيع متجول سريح على عربية ومن غير رخصة!!

○ أنا بشتغل فى شغل حلال وشريف علشان أقدر أعيش بعا يرضى الله.

قطعة غيار إنسان

- طيب انت هتشرف معانا كام ليلة فى الحجز وبعدين هفرج عنك بضمان محل إقامتك.
- طيب والبضاعة يا أفندم.. ده أنا مديون بتمناها.
- لا دى مش مسؤوليتى البضاعة اتصادرت ومشكلتك مع البلدية والمحافظة.
- طيب ممكن يا أفندم طلب أخير.
- عارفه يا عبد الله.. الحيس الانفرادى مش كده.
- بالظبط يا أفندم
- كان على عيني يا عبدو.. الزنازين الإنفرادى عندنا كلها مشغولة المره دى.. معلش بقى استحملنا شوية.
- جلس عبد الله على المقهى شارد الذهن، يشرب أكوابا من الشاى لا يعرف عددها.. ويفكر كيف سيسدد ما عليه من ديون للتجار بعد أن خرج من حبسه وفشل فى استرجاع بضاعته..
- إن عليه شيكات وكمبيالات لا بد أن يدفعها.. طلب كوبا جديدا من الشاى بعد أن فرغ الذى أمامه..
- وقف القهوجى أمامه بالصينية وأخذ يقلب له ويلمح له بطلب الحساب..

قطعة غير انسان

○ ده خامس طلب شاى يا معلم عبد الله .
مد عبد الله يده إلى جيبه ليخرج له الحساب .. فإذا به يجد
هاتفه المحمول يرن فى جيبه ..

أخرج الهاتف وبمجرد ان نظر فيه هب واقفا فى ارتباك
شديد فاصطدم بالقهوجى الذى سقطت الصينية من يده ورأى
عبد الله يجرى على الرصيف والهاتف فى يده ..
لقد كان اسم ندا هو الذى ظهر على هاتفه فأصابه بهذا
الارتباك المفاجئ ..

رفع الهاتف على أذنه دون أن يفتح الخط .. ثم عاد ففتح
الخط ..

○ ألو .. أيوه يا ندا هانم .. حاضر هجيب لحضرتك كل اللى
انتى عايزاه وهكون موجود فى الميعاد ..
طلبت منه أن يحضر لها بعض الأطقم ويقابلها فى إحدى
الكافيهات ..

ولم يستطع عبد الله أن يحضر أى طقم لأنه صار مديونا لكن
التجار .. ولكنه قد لبس أفضل ما عنده وراح قبل الموعد بعشر
دقائق ..

قطع غيار انسان

لم يصدق نفسه وهي جالسة أمامه تحكى له عن حياتها وعن عائلتها العريقة وأهلها ذوى المناصب والنفوذ..

سألها عن سر شرائها هذه الأثواب المتواضعة من العتبة.. وأجابته بما كان يتمناه ويحلم به.. إنها لا تحتاج إلى هذه الثياب فى شىء وأنها تعطيها لبعض الفقراء بمجرد أن تشتريها.. ولكن السرف فى هذا الأمر أنها معجبة به جدا وقلبيها يخفق بحبه.. وموضوع الملابس مجرد حجة لتراه وتتعرف عليه..

كاد عبد الله أن يطير ويحلق فى السماء من السعادة.. ها هي الدنيا ترضى عنه أخيرا وتفتح له ذراعيها بأوسع ما يكون.. إن هذه الفتاة الغنية الجميلة سوف تمنحه الحب والزواج والسعادة وكل شىء يتمناه..

أخذ يحدثها عن نفسه ومؤهلاته وتجاربه الناجحة فى الحياة العملية.. ثم سألها..

○ ممكن أعرف منك يا ندا إيه سبب إعجابك بى؟

وجاءت الإجابة منها غريبة وصادمة..

○ جسمك.

قطعة غبار إنسان

قالتها وهي تنظر نحوه في شراة واضحة كما ينظر الذئب إلى فريسته..

○ على فكرة انتى جريئة جدا انتى تقصدى إيه بالظبط؟
○ لا انت فهمتنى غلط.. أنا قصدى يعنى إنك لفت نظرى أول مرة لما شفتك عمال تتنطط على العربية.. ولاحظت أنك بتهمتم برشاقة جسمك وصحتك ودى حاجة كويسة..
○ بردو مش فاهمك يا ندا.. فى ناس كتير جدا أجسامهم وصحتهم كويسة..
نظرت إلى الأرض واكتسى وجهها فجأة بالحزن وهي تقول..

○ لكن أنا مش من الناس دول يا عبد الله.
○ ليه يا ندا انتى أجمل إنسانة شفتها.
○ لكن الحقيقة يا عبد الله إن أنا مريضة.. ومريضة مرض خطير كمان..

○ مريضة إزاي؟ عندك إيه طمىنى؟
وضعت يدها على وجهها وانفجرت فى البكاء وقامت مسرعة من أمامه..

قطعة غيار إنسان

ولم يخطر ببال عبد الله أبدا أن هذه الجلسة سوف تكون نهاية صحته هو إلى الأبد..

وظل عبد الله طوال ليله مشغولا يفكر فى ندا..

هذه الفتاة الجميلة الحزينة المريضة.. ترى ماذا يكون طبيعة مرضها.. وكيف لم تستطع علاج نفسها وهى من أسره ثريه تمتك المال والنفوذ؟

بالتأكيد انه مرض خطير تعجز أمامه الأموال.. وأحس عبد الله بمزيج فى داخله من شعور بالعطف والحب نحو هذه الفتاه الغنيه والمسكينه فى ذات الوقت..

ولكنه شعر بشيء من الارتياح.. ان بذلك تكون الكفة بينهما متوازنة.. فإنه من المستحيل ان يكون كفوًا لهذه الفتاه الحسناء الغنية سلاله الأسر العريقة وهو شاب فاشل معدم يعمل بائعًا متجولاً.. وأمامها مئات الشباب فى مثل مستواها الاجتماعى..

ان المرض هنا يجعل هناك سببا منطقيا لكى تحبه هذه الفتاه وترضى به.. كما ان عامل المرض هو عامل مشترك بينهما فكم قاسى هو من المرض النفسى طوال حياته.. وان كان هو يخفى

قطعة غيار إنسان

عنها هذا السر.. الا انه فى الوقت المناسب بعد زواجهما سوف يحكى لها هو الاخر عن هذا الامر..

فما اجمل ان تبوح بأوجاعك لمن يشاركك فى مثلها ويشعر بما تشعر به من الالم..

لابد اذا ان يقف بجوارها ويساعدها بكل قوه.. فهذا اقل شىء يفعله الإنسان اذا احب..

وأمسك عبد الله بهاتفه واتصل بها..

○ ندا.. ليه مشيتى فجأة بالطريقة دى.

○ أنا إنسانة محكوم علىّ بالموت يا عبد الله.. حرام أعذبك معايا.

○ صدقيني أنا مريت بظروف اصعب منك وكنت بتمنى الموت.. لكن كل شىء بيعدى فى النهاية.

○ كلامك بيصحى فى الأمل تانى.

○ طيب ممكن تقولى لى إيه طبيعة المرض اللى عندك؟

○ أنا عندى فشل كلوى يا عبد الله وفى حالة متأخرة جدا.

○ طيب مافيش علاج او عملية مثلا.. أكيد الطب عنده حل؟

○ مافيش أمل يا عبد الله إلا فى حالة واحدة.

- إيه هي؟
- إن حد يتبرع لى بكليته.
- صمت عبد الله لوقت وجيز ثم سألها..
- طيب يا ندا ولو حد اتبرع لك بكلية ده هياثر على صحته؟
- لا أبدا بالعكس يا عبد الله.. علميا الإنسان ممكن يعيش بكلية واحدة وبربع كلية كمان ويمارس حياته طبيعى جدا.
- اطمئنى يا ندا أنا هقف جنبك وإن شاء الله هتخرجى من أزمته.
- ولم يأخذ عبد الله وقتا كبيرا فى التفكير حتى عزم الأمر واتخذ قراره.. وعاود الاتصال بها مرة أخرى.
- اسمعى يا ندا.. أنا قررت أتبرع لك بكليتى.
- بجد يا عبد الله أنا مش مصدقة نفسى.. نظرتى فيك طلعت فى محلها.. انت شهم جدا ومخلص و..
- أنا بعمل كده يا ندا علشان حبيبتك.
- وأنا كمان يا عبد الله بحبك فوق ما تتخيل.. بص يا عبد الله هقولك على حاجة بس اوعى ترفض أو تفهمنى غلط.
- حاجة إيه؟

قطع غيار انسان

- أنا كنت ناوية أدفع مبلغ عشرين ألف جنيه تعويض للإنسان
اللى هيتبرع لى بكليته والمبلغ ده هيكون من نصيبك..
- اوعى تقولى الكلام ده مرة تانية.. أنا بعمل كده عشان حبيبتك
وبس.. علشان الإنسانية اللي هتكون مراتى وشريكة عمرى..
- طبعاً يا عبد الله أنا منتظرة اليوم ده بفارغ الصبر.. ممكن
أشوفك بكره ونتكلم براحتنا.
- وبعد عدة لقاءات بين عبد الله وندا فى مجموعة نوادى
وكافيهات مختلفة كان هذا اللقاء الأخير بينهما فى هذه العيادة
الخاصة الأشبه بالمستشفيات الاستثمارية..
- اتفضل يا عبد الله اطلع الدور التانى.. أوضة العمليات
جاهزة
- طيب وانتى يا ندا؟
- أنا.. أنا هكون جنبك فى الأوضة التانية.
- كان هناك اثنان من الأطباء الذين استقبلوا عبد الله بحفاوة
بالغة.. وأدخله أحدهم إلى غرفة العمليات بسرعة، بعد أن
حصلوا منه على توقيع بإقرار أنه موافق على إجراء هذه العملية
وعلى مسؤوليته الخاصة..

قطع غيار انسان

- وفى لمح البصر كان فى غياهب البنج..
أفاق عبد الله من البنج ليجد الدكتور فوق رأسه..
- حمد لله على السلامة يا بطل شد حيلك علشان كلها شوية
وتقوم تروح.
- طيب أنا حالتى عامله إيه يا دكتور؟
- زى الفل كله تمام.
- طيب وندا؟
- ندا مين.. آه ندا كويسة جدا زى الفل.
- خرج عبد الله فى الصباح من غرفته وهو ممسكا بجانبه الذى
نزعت منه كليته.. وأخذ يستند إلى الحائط وهو يجر قدميه
بصعوبة.. نظر إلى الغرفة المجاورة له فلم يجد فيها ندا..
هبط إلى الطابق الأسفل وسأل العامل الموجود..
- هو فين المريضة اللى كانت فى الأوضة فوق؟
- أنا معرفش حد كله مشى والدكاترة كمان، وانت كمان لازم
تمشى دلوقت علشان فى عيانيين حاجزين وعلى وصول.
- وفى الطريق حاول عبد الله الاتصال عليها أكثر من مرة ولكن
كان هاتفها مغلقاً باستمرار..

قطعة غيار إنسان

لم يقو على السير وأحس بألم رهيب يعتصر جانبه فتوجه إلى المستشفى التي كانت بالقرب منه وبمجرد أن وصل إلى بابها شعر بدوار شديد في رأسه..

أخبره الطبيب المختص أنه يحتاج إلى التبرع بالدم فقد كان يعاني من هبوط حاد بالدورة الدموية نتيجة نزيف عقب العملية..

وفي قسم التبرع بالدم سمع عبد الله عجب العجاب واكتشف أنه يعيش في زمن دراكولا ومصاصي الدماء..

نظر التمرجي في الورقة التي في يده بخط الدكتور وقال بصوت أجش..

○ هجيب لك دم منين.. الدكتور مدحت ده بيتكلم على كيفه..

ماهو عارف أن بنك الدم عندنا فاضى..

ثم مال التمرجي على أذن عبد الله..

○ بص أنا ممكن أتصرف لك فى كيس أو كيسين.. على مائة

وخمسين جنيه الواحد بس حاجة نظيفة.. إيه رأيك معاك

تدفع؟

○ معايا معايا.. هددع.

قطعة غيار إنسان

وتمدد عبد الله على السرير وقد غرزت الإبرة في وريده لتسكب فيه هذه البضاعة العزيزة النادر وجودها..

كان بجواره على السرير الآخر شخصا كاشفا ذراعيه يتبرع بدمه.. كان هناك وشما على ذراعه يعرفه عبد الله جيدا من أيام الزنزانة.. إنه وشم المسجلين خطر.. وكان يبدو على هذا الشخص علامات الإدمان..

لاحظ ان عبد الله ينظر إليه فبادره بالكلام..

- مساء الخير يا أخ.
- اهلا وسهلا صباح النور.
- هو إحنا الصبح ولا إيه.. ماشى.. انت جاي تدى ولا تاخذ؟
- أدى إيه واخذ إيه!
- يعنى جاي تدى دم ولا تاخذ دم.. وشك أصفر.. باين عليك جاي تاخذ.
- أيوه فعلا أنا جاي آخذ.
- عطوك الكيس بكام؟
- ميه وخمسين جنيه.

قطعة غيار انسان

- يا ولاد النصابة .. انت بتشتغل إيه .
- أنا بياع ببيع هدوم .
- وأنا كمان بياع ببيع دمی .
- ثم انفجر هذا الرجل فى الضحك بصوت عالٍ جداً لا يخلو من التكلف الشديد وعاود حوارہ مرة أخرى مع عبد الله ..
- بص لو احتجت .. دم .. كلية .. قلب .. أى حاجة .. ده تليفونى اتصل بى .. أنا اسقى زيكو ..
- تعرف يا زيكو أنا لسه متبرع بكليتى دلوقت .
- فالتفت زيكو بجسمه كله إلى عبد الله وقد تحولت ملامح وجهه وتعبيراته إلى شر صرف وقال له فى حدة ..
- اتبرعت بكليتك ازای .. ولين .. وقبضت كام .. انت شغال لحسابك ولا مع حد؟ .. خد بالك المنطقة دى لها كبير ..
- الحكاية مش سايبة يا حلو ..
- حيلك حيلك .. أنا ما أخذتش ولا ملیم .. أنا اتبرعت بكليتى ببلاش .
- ببلاش !! ببلاش إزای .. لا احكى لى انت حكايتك بالظبط .

قطع غيار انسان

وأخذ عبد الله يقص له قصته من بداية عمله في العتبة على
عربة الملابس.. وكيف رأى ندا وكيف تعرف عليها واتفقا على
الزواج حتى عرف حقيقة مرضها وتبرع لها بكليته..
وبمجرد أن أكمل عبد الله قصته وهو متأثر بها جدا.. انفجر
زيكو في الضحك مرة ثانية..

○ هم عملوها فيك يا مغفل!

○ هم مين؟

○ دول الفريق اللي شغال مع التابعي.. معاه رجاله وتمرجية
وممرضات وحريم تحل من على حبل المشنقة.. بس تعلب
مالوش أمان.

○ يعنى إيه مش فاهم يا زيكو؟

○ يعنى يصطادوا المغفل اللي زيك كده ويلعبوا عليه شوية..
وبعدين يسرقوا كليته.. انت عارف كليتك دى زمانها دلوقت
اتباعت بكام , بربع مليون ويمكن بنص مليون كمان.

○ مش ممكن.. مش معقول الكلام اللي انت بتقوله ده.. الكلام
ده لو صحيح يبقى أنا لازم أجييها.. لازم أنتقم منها.

○ سيبك من الكلام الفارغ ده وتعال اشتغل معانا هتاكل لوز.

- أشغل معاكم إزاي يعنى؟
- احنا تبع الكبير زينهم باشا.. رجل حقانى ومش بياكل عرق حد.. وممكن كمان يجيب لك حقك من البت دى بس لو أثبت وجودك فى الشغل..
- وأعمل إيه علشان أثبت وجودى، هو أنا بقى ليا وجود أصلا.
- يعنى لو جبت زبون يبيع أو يشتري لك عمولة وسمسرة حلوة.. ولو اتبرعت بحاجة من جسمك هتاخذ حقك وانت واقف.. ولو عرفت تشتغل فى الجثث بردو مطلوب وهنقدرك.. ويوم ما تتزقنق تكيس لك كيسين.. يعنى تبيع من دمك كيسين زى ما أنا بعمل دلوقت..
- إيه البشاعة دى.. هو إحنا عايشين فى غابة.. يا رجل ده الموت أكرم.
- انت بتقول إيه يا جاهل.. ده إحنا بنعمل عمل خير إنسانى عظيم.. انت مش عارف إن الدم اللئى أنا ببيعه ده بينقذ عيان بيموت.
- إحنا مش بنكسب فلوس بس، إحنا بنكسب ثواب كمان.
 وشعر عبد الله بأنه فعلا جاهل كما قال عنه زيكو.. كل

قطعة غيار إنسان

الأحداث التي حدثت له طوال حياته تثبت أنه جاهل..
إن هذا المدمن خريج السجون قد فهم الحياة أكثر منه هو
خريج كلية التجارة.. على الأقل هو يبيع دمه وأعضائه بمقابل.
وأما هو فقد باع كليته مقابل الوهم..
لقد خدعته هذه الفتاة أكبر خدعة في الوجود باسم الحب..
من يصدق هذا.. أن تجلس المرأة مع حبيبها تتغزل فيه وفي
الحقيقة أن كل ما بداخلها وهمها الوحيد أن تنزع كليته
وأحشاه..

من الذى خدع البشرية وقال إننا تقدمنا وأصبحنا أهل حضارة
فى القرن الواحد والعشرين.. محض كذب هذا الكلام..
إن الإنسان فى أشد عصور البربرية لم يكن يبيع أعضائه.. لم
يكن يتاجر فى لحمه ودمه..

حتى جثث الأموات أصبحت سلعة غالية الثمن ينتهشها
التجار، فلا يبقى من جثة الميت فى قبره سوى الكفن.. كان
للصوص قديما يسرقون القصور.. وإنما الآن يسرقون القبور..
لم تعد هناك راحة لحي ولا ميت.. حتى الميت لا يترك
لينام فى سلام.. فجسده إما أن تستلمه المشرحة فتقطعه كما

قطعة غيار إنسان

تشاء وتوزعه قطعا على طلبة كلية الطب.. وإما أن يوضع في القبر ليسرق أو يباع بمعرفة التربي كى يقطع وتوضع أعضاءه فى أكياس حسب الطلب والحاجة..

إن هند بنت عتبة عندما أكلت كبد حمزة لم تكن بهذه البشاعة التى فعلتها معه ندا.. فإن هندا على الأقل كان لها مبررا لما فعلته من وجهة نظرها.. كان لها تأرا عنده.. وأما ندا فلم يكن لها أى مبرر لما فعلته معه..

إنه لم يقدم لها أى شر حتى تنتزع منه أحشاءه.. لم يقدم لها سوى الحب والإخلاص.. كان فى نيته أن يتزوجها فدفق لها أغلى مهر فى التاريخ ولم ينل منها سوى صفة أثبتت له أنه بالفعل مغفل كبير كما قال له هذا المدمن..

○ اسمع يا زيكو لو حببت أتبرع بكليتى الثانية ممكن آخذ فيها مليون.

○ اسمها تبيع مش تتبرع ,, بطل عبط بقى.

○ أبيع ولا أتبرع مش مهم.. المهم أنا عايز مليون ممكن الباشا الكبير بتاعكم يلاقى حد يدفع لى مليون.

قطع غيار انسان

○ لا.. الكلية متجيش مليون.. هو توبها ربع مليون.. لو عايز مليون اشتغل فى القلب.

○ طيب وأنا هعيش إزاي لما هبيع قلبى كمان.

○ يا عم وتعيش ليه، يعنى من حلاوة العيشة.. خلى الورثة ومراتك وعيالك يدعوك وانت فى الجنة..

○ أنا لسة مش متجوز يا زيكو.

○ يبقى بالراحة على نفسك.. حته طحال.. شوية دم.. كده يعنى.. أو اشتغل فى السمسة هتكسب ذهب.

وبعد فترة من الزمن أصبح عبد الله نجما ساطعا فى مافيا بيع الأعضاء..

كان هاتفه لا يتوقف عن الرن من اتصالات الزبائن.. رجال أعمال ومسئولين فى الدولة وفنانين ومشاهير.. وكل واحد منهم له طلبه الخاص الذى يتلف عليه ولديه الاستعداد أن يدفع فيه كل ما يملك لينقذ حياته..

وتوسعت الشبكة التى أصبح عبد الله يديرها بنفسه فأصبح زيكو سكرتيره الخاص.. وأصبح معه أطباء وسماسرة وحنوتية ولكل عضو فى هذه الشبكة دوره وتخصصه..

قطع غيار إنسان

فالمسار يجلب له الزبون أو الضحية التي سيتم سلخها وأخذ أحشاءها.. والطبيب هو من يقوم بعملية نزع الأحشاء سواء كانت كلى أو كبدًا أو عينًا..

وأما الحانوتي فكان متمثلاً في عويس التربي الذي كان بارعا في توريد الجثث الطازجة والتي يتلقفها الأطباء في سعادة بالغة..

وأصبح عبد الله يمتلك رصيда في البنك ودفتر شيكات وسيارة أحدث موديل..

وعندما أصبح له اتصال بعملاء في أوروبا وذاع صيته في دول الخليج قرر أن يفتح محلا ليكون مقرا مخصصا لهذه التجارة العالمية..

وبالفعل اشترى عبد الله محلا في وسط البلد ووضع عليه يافطة كبيرة مكتوب عليها.. «محل بيع قطع غيار للإنسان» ووضع بداخلها قائمة بالأسعار..

العين بكذا..

واليد بكذا..

والرجل والكبد والطحال والقلب..

قطعة غيار إنسان

كل عضو آدمى أمامه سعره ودرجة جودته حسب الطلب
ومستوى الزبائن..

حتى أتى ذلك اليوم الذى تلقى فيه عبد الله مكالمة
هاتفية تخبره بأن والدته سقطت على الأرض وتم نقلها
للمستشفى..

قطعة غيار إنسان

أسرع عبد الله إلى غرفة العناية المركزة التى ترقد فيها
أمه غائبة عن الوعي وراح يقبل يدها ورأسها ويبكى بحرارة
شديده...

كانت كلماته مع الأطباء تفيض أسى وحزن..

○ أرجوكم أبوس ايديكم اعملو أى حاجة انقذوا أمى.. أمى
لازم تعيش.. لازم تعيش.

○ يا عبد الله بيه احنا مهتمين بحالتها جدا لكن الأعمار دى
بيد الله.

○ أمى عمرها ماشافت ولا يود حلو.. كل حياتها شقا وتعب..
معقول فى الوقت اللى أنا أتغنى فيه وعاييز أعوضها تسببني
وتموت.. لازم تتصرفوا لازم تعملوا حاجة.

○ مش هنقدر نخبى عليك حالتها حرجة جدا!

○ يعنى إيه حرجة.. أنا مستعد أدفع أى فلوس.. لو عايزين
تعملو لها زرع كبد أو كلى أو حتى قلب أنا موجود عندى
وأنتم عارفين.

○ المسألة مش كده.. الموضوع أن عندها جلطة وده مش ينفع
معاه عمليات الزرع أو نقل أعضاء.

قطعة غيار إنسان

- الكلام ده كلام فارغ.. أكيد هي محتاجة نقل دم جديد أو نقل شيء معين علشان تعيش.
- الشيء الوحيد اللي ممكن يخليها تعيش هو عملية نقل روح.. وده المستحيل على البشر.
- لو ينفع أنا مستعد أتبرع لها بروحي حتى لو هموت مكانها..
- يا عبد الله بيه إذا كان الطب كله عاجز أنه يفسر إيه هي الروح أو يعرف سرها.. انت نفسك متعرفش روحك ولا تعرف مكانها.
- واصطدم عبد الله بهذه الكلمات.. إنه بالفعل لا يعرف روحه.. لقد عاش حياته كلها ولم يفكر فى يوم من الأيام ما هي هذه الروح التي يعيش بها..
- لم يسأل أبدا عن سر وجوده ونفخة الحياة التي تسرى فى جسده.. وفى هذه اللحظات خرج الطبيب من غرفة العناية المركزة وهو يقول له..
- شد حيلك البقاء لله.
- وهمس التمرجى فى أذنه..

قطع غيار انسان

- نتصل بعويس الحانوتى يا باشا؟
فصرخ عبد الله فى حالة هستريا شديدة..
- لا لا لا.. اوعى تعمل كده.. كله إلا عويس.. عويس لا...
ولم تعط الأحداث لعبد الله فرصة كى يحزن على أمه أو يأخذ
عزاءها.. فقد وجد زيكو مقبلا عليه يجرى مسرعا , يقول وهو لا
يستطيع أن يلتقط أنفاسه..
- الحق يا عبد الله بيه الوزير اللى اشترى منك كبد لأخوه..
الكبد طلع مش سليم وأخوه مات.. والدنيب مقلوبة عليك
والحكومة شمعت المحل..
- لم ينطق عبد الله بكلمه وظل صامتا.. حتى نزل من سلم
المستشفى وركب عربة الشرطة التى كانت فى انتظاره.. ليجد
نفسه أمام ظابط المباحث الذى أصبح بالنسبة له - عشرة
عمر.
- والله زمان يا عبد الله.. تلف تلف وترجع لى.
○ أنا خلاص تعبت من كتر اللف..
- هتقول إيه المرة دى.. حد فى الدنيا يفتح محل ويكتب عليه
بالبنط العريض.. قطع غيار للبنى آدمين.. ده انت قادر أوى.

قطع غيار إنسان

- هي دى الحقيقة يا بيه.. الفقير فى زماننا أصبح مجرد قطع غيار للغنى.
- وإيه اللي يخليك يا عبد الله تعمل كده.. إيه اللي يخليك تشتغل شغلانة زى دى؟
- لأن الإنسان فعلا بقى محتاج قطع غيار.. المجتمع كله محتاج قطع غيار لأنه خلاص فسد وأصبح على وشك الهلاك.
- طيب وفكرة قطع الغيار بتاعتك دى ونقل الأعضاء هي اللي أنقذت الناس.
- أبدا وعمرها ما هتنتقذ حد.. لأن الناس مش بس محتاجة نقل أعضاء.. الناس أصبحت محتاجة نقل روح.
- يعنى إيه بقى الكلام ده يا عبد الله انت هتخرف تانى.
- الروح.. الروح اللي فى وفيك ومش قادرين نعرفها.. الروح اللي هي سر الحياة.. الروح اللي هي نفخة الإله.. هي دى اللي لو اهتمينا بيها هنتقذ الناس وتتعديل الحياة.
- نهتم بيها إزاي يعنى.. ما هي الروح طبيعى موجودة فينا..

قطعة غبار إنسان

○ لا.. هي مدفونة فينا.. لكن إحنا محتاجين روح تتحرك..
تنطلق..

محتاجين روح تعلمنا الطيبة والصفاء والصدق..
روح تلهمنا أننا نحب الناس.. ونبكي على آلام الناس..
مش نشمت فيهم ونضحك عليهم..
روح تزرع الأخلاق فى العلم..
وتزرع الرحمة فى الطب..
وتخلى رجل الدين يفكر قبل ما يكفر..
والسياسى يوفى لما يوعد..

روح تخوفنا من صرخة المظلوم وقطع عيش الناس..
روح ترجعنا من تانى لرب الناس.

○ أيوه بس اللي انت عملته ده كان شغل جزايرين.. انت كنت
بنقطع فى الناس.

○ الناس دبحتنى الأول من زمان وانت عارف.. كنت عايش
بينهم زى الحمام وكل ما أقف على شجرة يصطادونى
ويعذبونى ويدبحونى.. وعمرى ما بقيت قوى غير ما
دبحتهم.

قطع غيار انسان

- يعنى كنت سعيد باللى كنت بتعمله؟
- أبدا عمرى ما عرفت طعم السعادة حتى وأنا بنتقم منهم ويقطع فى لحمهم ويعمل ثروة من دمهم بردو كنت حزين.
- طيب ليه بقى.. إيه حجتك وانت كنت من أغنى الناس فى البلد.
- أنا اكتشفت أن الإنسان مش مخلوق علشان يلم فلوس وياكل.. لأن أنا كان عندى ثروة وعندى أكل يكفى بلد وعمرى ما شبعت.. الإنسان مخلوق علشان حاجة تانية خالص..
- أمال مخلوق ليه , علشان يقطع فى خلق الله.
- لا مخلوق علشان يعرفه ويعبده.. «وما خلقت الجن والإنس إلا ليعبدون».
- طيب وانت عرفت الله وعبدته يا عبد الله.. !
- لا.. لكن النهاردة عرفته.. عرفته لما عجزت إنى ألمس الروح أو أنقلها.. عرفته لما شفت قدرته على الحياة والموت.. عرفته لما شفت كلمته كما تدين تدان.. عرفته لما لقيت كل الطرق موصلة ليه.. النجاح والفشل.. الغنى والفقر.. الحياة والموت.. فى الآخر كله موصل ليه هو.. هو

قطع خيار انسان

بس... النهارده عرفته ومز النهارده هعبده..

○ يا خسارة يا عبد الله كلامك حلو لكن أنا مضطر أنفذ

القانون.. يتم حبس المتهم أربعة أيام احتياطياً على ذمة

التحقيق ويراعى التجديد له فى الميعاد..

○ بس أرجوك انا لي طلب و حد عندك..

○ عارف يا عبد الله... زنزانه انفرادى يا مغاورى.

من أعمال المؤلف

- العالم الذى لن يكون (رواية).
- كرامات الخطاب، للفاروق عمر بن الخطاب.
- طلعة الشمس.
- أنشودة الإنسان الكامل (شعر).
- الساجد تحت العرش.
- زمن الإحراج (مجموعة قصص قصيرة) - تحت الطبع.

للتواصل مع القراء
البريد الإلكتروني

Abonorelden 3000 @ yahoo.com

Abonooreldin @ hotm Ail. COM

ت / ٠١٠٢٦٤٨٤١٧٦

رقم الإيداع	٢٠١٢ / ٢١٥٦٩
الترقيم الدولي	ISBN 978-977-02-7687-7

٢ / ٢٠١٢ / ١٧١

طبع بمطابع دار المعارف